


UG WALA MAHIBALO NIINI

 Salamat, Igsoong Neville. Ang Ginoo magapanalangin kanimo. May nalakbitan ko nga usa ka butang, dili ba? Gusto kong pasalamatan ang Ginoo, sa bug-os gayud, nga namuhat Siya para sa batang lalaki ni Igsoong Capps. Nahitabo lang nga medyo nakahigayon ako nga makabalik sa Indiana. Nahibalo ako nga wala nila kini ginarekord; nagatoo ko nga wala. Ug mao nga wala ko'y nakitang si kinsa man dinha sa sulod, busa sila... Mibalik ako aron nga magapangayam og squirrel. Ug busa sa hunahuna ko kinahanglan nga pagpasenyahan ako ni Charlie, siya ug si Nellie, ug sila didto sa Kentucky, sulod sa usa ka adlaw o duha, aron nga makapangayam og squirrel. Mao nga, mas gustohon ko pang mapalabay ang bisan unsa, ang bisan unsa nga matang sa lingawlingaw, dayon moanhi dinhi sa... mga tunga-tunga sa Agosto, ug mangayam og squirrel kauban sila Charlie ug Banks, ug silang tanan. Medyo naandan ko na kini nga butang. Ug mao nga giuban ko si Joe...

² Niadtong dinhi kami sa miaging higayon, nagmasakiton ang tanan, tungod sa pag-usab niadtong hilabihan kainit nga klima ngadto niining—niining pagkatugnaw nga klima nga aduna kamo dinhi. Kabalo ko nga gadahum mo nga dili kini tugnaw, pero adto mo bisan sa usa ra ka higayon didto sa Arizona. Usa na ka gatus ug siyam ang temperatura didto sa paggikan ko niadtong miaging buntag; ug dayon sa mga tungang-gabii, sa kagabhion, sa dihang mipaubos na ang tugnaw nga hangin gikan sa mga kabukiran, nubenta'y-sais pa kini sa gihapon. Uh-huh. Kita n'yo, kana'y tungang-gabii na gani, sa dihang mipaubos na ang tugnaw nga hangin. Ug mao nga kini... Okey lang didtong lugara sa panahon sa ting-tugnaw, apan para kana sa mga tanga ug mga tabili pag-panahon na sa ting-init, dili na sa mga tawo. Bisin gani ang tanang mananap mamalhin ngadto sa mga kabukiran. Dili nila kana maagwanta.

³ Ug kanunay akong anaa sa gawas ug gina-praktis ang akong gamay'ng pusil. Ako... Sa usa ka hinungdan gusto ko lang isulti kaninyo ang mahitungod sa gamay'ng batang lalaki nga Capps. Ug ingon ako... Ug, si Joe, kinahanglan nga ihatag ko na lang kaniya ang pusil, tungod kay mas maayo pa man siya kanako motiro. Na-testingan na namo kadto, ug ako niadto—ako niadto gitiro ang mga tack sa gilay-on nga singkwenta ka yardas. Ug miingon ako kang—kang Joe... Miingon si Joe, “Daddy, nagtoo ko nga mahimo ko kana.” Ang makaluluoy'ng bata masakit kaniadto ang ulo. Naiampo ko na siya niadto, taas ang hilanat. Miuban siya kanako ngadto sa lugar nga ginabansayan sa pagpamusil, ug akong...

⁴ Ang unsa mang two-over-ten bore nga ripleng calibre baynte-dos, ginalahus niini ang direksyon sa puntirya niini sa gilay-on nga baynte-singko ka yardas; mao man kini usab pag-abot og singkwenta, pareho lang, kung two-over-ten kini. Mao nga. . . Ug gipusil ko kadto sa gilay-on nga baynte-singko ka yardas. Ug mao nga aduna pa ako og duha ka mga tack ug gibutang ko ang mga niini, ug gipusil pa gyud ni Joe ang maong duha ka mga tack! Wala na ko'y nabilin nga mga tack, busa nagbutang na lang ako og usa ka gamay'ng bahin sa daang puntinganang kolon nga nagkabahinbahin na didto, kanang ginatiro sa mga nagbansay og pagpamusil, mga ikaupat nga bahin lang sa usa ka pulgada ang gilapdon, ug ginaplastar kadto sa gilay-on nga singkwenta ka yardas, ug natunga niya kadto sa duha. Ug ang teleskopyo niadto naiplastar para sa akong mga mata, nga mas magwang lang og pipila ka tuig sa iya. Busa miingon siya, “Kabalo ka ba kung unsa? Kinahanglan ko agihan una ug sultihan si Billy nga magpalayo-layo na kanako gikan karon.” Kita n'yo? [Mikatawa si Igsoong Branham ug ang kongregasyon—Ed.]

⁵ Mao, mao nga miingon ko, “Bueno, sultihan ko ikaw kung unsa,” miingon, “moadto kita didto ug ipakita kana kang Igsoong Norman.”

⁶ Miingon ko, “Joe, sa mga panagsangka sa tibuok kalibutan, dili ko igsapayan kung kinsa man sila, walay si kinsa man. . .” Karon, ang mga tack wala milahus nga patakilid, milahus ang mga niini ngadto sa sentro mismo. Ug kadtong bahina, nga dili mosobra, sa hunahuna ko, og ikaupat nga bahin sa usa ka pulgada, ug usa ka ikadise-sais ang kanipison, ug ikaupat nga bahin sa usa ka pulgada ang katas-on, nabahin niya kadto sa duha, sa gilay-on nga singkwenta ka yardas. Ingon ko, “Walay ni usa sa tibuok kalibutan ang makahimo og mas maayo pa niadto nga pagkatiro. Mahimo nila, sa mga kampeyon, mahimong mabuhat ang mao rang butang, apan siguradong dili ka makahimo og tulo ka mas maayo nga mga pagkatiro kay sa niini.” Ang mga tack, nga wala nangabaliko, diretsong buslot lahus sa papel kon diin milahus ang maong mga tack. Ug ingon ko, “Walay si bisan kinsa ang makahimo nianang—nianang usa ka mas maayo nga pagkatiro.” Bueno. Sa hunahuna ko nawala dayon ang sakit sa iyang ulo.

⁷ Ug miingon ko, “Bueno, moadto na ta ug ipakita kini kang Igsoong Norman,” nga nagatrabaho sa *Field And Stream*, ang tindahan ni Igsoong Tony Stromie sa mga gamit nga pang-isports.

⁸ Miingon siya, “Moagi una kita kang Billy.” Ingon siya, “Ako—aduna lang ako'y gustong isulti kang Bubby.” Kita n'yo? Ug, sa tinuod lang, ang iyang igsoon wala pa gayud nakahimo og ingon-ana ka maayo. Busa miingon siya, “Moagi sa ta didto.”

⁹ Ug sa pagsulod ko pa lang sa pultahan, naka-pajama pa si Billy kaniadto. Ug miingon siya. . . Miadto kami og sayo, tungod kay grabe kainit. Ug busa miingon siya. . . Mitingog ang telepono. Ug miingon ko. . . Medyo mitan-aw siya kanako nga ingon niana. Ingon ko, “Tingali og tawag para sa masakiton.” Ug si Igsoong Capps kadto para sa iyang batang lalaki, nga anaa sa lawak operahanan kaniadto, nga adunay peritonitis ug nagahulat nga ma-operahan. Ug karon lang miingon siya kanako nga ang iyang anak nga lalaki nauli-ulian na, gayud.

¹⁰ Busa, inyo bang nakita kung giunsa sa Dios sa pagbuhat niadto, bisan na lang sa tingog niadtong gamay’ng bata, nga si Joe? Imbes nga moadto kang Igsoong Norman, wala unta kami didto, ug wala unta kami miadto didto. Ug naghiusa kami ni Igsoong Capps. Wala ko ginaingon nga ang among mga pag-ampo ang maoy nagbuhat niadto, apan aduna kadto og kahulogan alang kaniya nga magkakontakay kami nga sama niadto. Ug, sa tinuod lang, ingon niadto kung unsa. . . Pagnagkaaduna ka og—kinahanglan aduna ka’y pagtoo sa kon unsay imong ginabuhay. Kita n’yo? Ug, kadto, mao ang iyang pagtoo nga magtawag, ug si Billy niadto. . .

¹¹ Migasto sila og kuwarta kaniadto. Miingon siya, “Siguradong usa gayud kini ka pang-long distance nga tawag,” miingon, “migasto siya og halos lima ka dolyares nga kantidad sa sensilyo, sa tulo ka. . . para sa tulo ka minutos nga tawag.” Ug naghunahuna ko nga gikan pa kadto sa New York o gikan pa sa usa sa mga isla o sa kung asa man. Apan personal gayud siya nga mitawag, aron nga maistorya si Billy imbes nga si Loyce, nakita n’yo, ug mao kadto’y hinungdan nga nakagasto siya og ingon—niadto aron lang nga makakontak.

¹² Ug karon nauli-ulian na ang iyang anak nga lalaki. Miingon si Igsoong Capps nga gihatagan sa doktor ang iyang anak og diyutay lang nga paglaum nga makarekober pa niini, nakita n’yo, gikan sa maong operasyon. Ug mapasalamaton kita sa Dios karong buntaga tungod niini, malipayon gayud ta tungod niini.

¹³ Karon, nakaabot kami, mga pabanagbanag na kaganinang buntag, ug nagkaaduna ako og mga tulo ka oras nga tulog, ug—ug gikapoy gyud ko. Apan sa diha nga ang simbahan. . . pag-abot na sa pagsimba, aba, mianhi gyud ko.

¹⁴ Ug kung itugot sa Ginoo, kinahanglan kong moadto sa Kentucky karon, sa ako nang gikaingon. Dayon nagsaad ako nga mowali og usa ka adlaw’ng Dominggo samtang ania ako dinhi, ug kinahanglan nga moadto na ako karong sunod nga Dominggo, tungod kay pagkasunod anaa ako. . . kinahanglan kong mobalik. Tungod kay molakaw na usab ako, padulong sa Canada. Busa ako—kinahanglan kong makaadto na didto pagkasunod Dominggo, ug sa sunod Dominggo sa buntag.

15 Ug miingon si Igsoong Neville, “Nganong dili ka na lang mogawas ug pangumostahon ang mga tawo, ug makig-istorya kanila sa pipila lang ka minuto?”

16 Miingon ko, “Igsoong Neville, wala ko pa gani naablihi ang akong Biblia, halos.” Ingon ko, “Ako . . .”

17 Miingon siya, “Bueno, gawas ug pagpakig-istorya kanila.” Ug, Igsoong babayeng Neville, ako—ako—wala ako kahibalo kon giunsa nimo pagbuhat niini. Siya usa ka maawhagon gayud nga tawo. Apan samtang . . .

18 Dili na ako makahigayon sa pagsulti niini sa dihang mapuno na kining maong lugar, ug nga magkaguot, ug tanan na, apan mapasalamaton kaayo ko sa Dios alang sa usa ka pastor nga sama ni Igsoong Orman Neville. Matinud-anon, matinud-anon gayud siya, ngadto sa Katuyoan, ug dili gayud mo makadungog kaniya nga magbagulbol. Naglingkod ako kaganina dinha sa likod. . . Nagkaaduna ako og maanindot nga tunga sa oras nga pagpakig-istorya kaniya samtang nalingaw ako kang Igsoong Mann, ug mao nga mas daghan pa ako’y isulti kaniya mahitungod niana pagmoadto na kami sa Colorado niining tuiga. Busa sa dihang nalingaw kami sa iyang mensahe, ug nagkaaduna ako og maanindot nga pagpakig-istorya kang Igsoong Neville. Ingon ko, “Wala pa gani ako’y nasulti nga bisan unsa sa mga tawo mahitungod sa atong buutan nga pastor.” Miingon ko, “Maayo ba ang pagtagad sa mga tawo kanimo?”

 Miingon, “Wala na’y mas maayo pa niini.”

 Ug ingon ko, “Bueno, mao kana ang gikalipay kong madungog.”

19 Pagnalipay ang usa ka pastor, ug nalipay ang mga miyembro, nagapahimo kini og usa ka maayo nga iglesia, ug nalipay ang Dios kung ingon-ana. Ug sa hunahuna ko, ang makita sila nga pareho nga nangalipay, ilabina sa niining adlaw sa Mensahe nga atong ginadala, sa hunahuna ko nagapakita kini sa pagpadayon sa Mensahe diha sa mga tawo ug sa Dios. Kita n’yo?

20 Ug mapasalamaton gayud ako alang kang Igsoong Orman Neville, ug sa iyang buutan nga asawa ug pamilya. Ug nagaampo ako nga ipapadayon sila sa Dios nga matinud-anon ngadto Kaniya ug sa Katuyoan. Ug kung nakapahimuot gayud kini Kaniya, hinaut nga makapabilin pa kami dinhi sa tabernakulo sa dihang moanhi na si Ginoong Jesus para kanato, nakita n’yo, aron pagakuhaon kita diha sa Pagsakgaw. Nanghinaut kami nga dungan kaming magkatigulang, ni Igsoong Neville, nga ang usa magaabay sa usa, ug magatindog didto gamit ang mga sungkod, nga sa gihapon nagapaningkamot nga makasugakod. Kita n’yo? “Dayon kita mangausab, sa kalit, sa usa ka pagpamilok.”

Ug kining karaan nga mga kupo sa unod atong
 pagahukason,
 Ug mangbangon ug magadawat sa ganting
 walay-katapusan,
 Ug magasinggit nga magakayab kita ngadto sa
 kawanangan,
 “Panamilit, panamilit,” matam-is nga takna sa
 pag-ampo.

Magakayab na kita nianang tungora.

²¹ Nadungog ko ang mahitungod sa pagkaayo ni Igsoong Coomers nga gikan sa Ginoo, ug mapasalamaton gyud kita tungod niana. Daghan kaayong mga butang. Busa mapasalamaton ako nga maania dinhi karong buntaga. Ug naghunahuna ko, imbes nga . . .

²² Kanunay akong nagaanhi dinhi nga aduna gyu’y teksto, ug nagawali. Naghunahuna ko nga—nga moanhi lang unta ako karong buntaga. Ug ingon ko, “Igsoong Neville, bantayan ko gayud ang orasan, ug tingali pagawason na ang mga tawo sa hustong takna, ug makigsulti lamang kaninyo nga gikan sa akong kasingkasing, sa pipila ka minuto; mga butang lamang, nga kinahanglan natong. . . Wala, wala man nila ginateryp kini o unsa man, busa magpakig-fellowship lamang kita samtang ania ang mga tawo sa iglesia, nakita n’yo, nga kita-kita lang.”

Busa mag-ampo kita.

²³ Minahal nga Jesus, mapasalamaton kami Kanimong pribilihiyo nga aduna kami sa panagkatigum dinhi. Ug, oh, sa dihang mitan-aw ako sa niining taberbakulo kaganinang sayo sa buntag, human sa tungang-gabii, nga milabay, napamalandongan ko kon giunsa gayud Nimo sa pagtipig niini.

²⁴ Ug nadumduman ko ang karaang lim-aw nga ania dinhi kaniadto, ug ang dagkung mga sagbot nga ania pa kaniadto, halos dinhi mismo kon diin kining pulpito. Ingon nga usa ka batan-on pang lalaki, ako—mitindog ako dinhi. Miingon si Mr. Ingram nga mahimo namong makuha ang maong lote sa gamay’ng kantidad lamang, ug mopasiuna lang og bayad; ug bisan walay kwarta, walay panggarantiya, o walay bisan unsa nga ikatanyag, kondili paningkamotan lamang. Daw sa giunsa kini, kaniadto, nga ang tibuok bili misobra lang gamay sa duha ka libo ka mga dolyares; nga mihatag pa og baynte ka tuig aron kini mabayran.

²⁵ Ug karon, Ginoo, tan-awa kini karon! Ug samtang nagasugod pa lamang kini kaniadto, nga napahimutang sa usa ka lungag dinhi, nga nagasulod ang tubig; daw sa unsa nga Imong gisaad kanamo, pinaagi sa Pulong: “Ako mao ang Ginoo nga nagtanum niini, Ako kining pagabisbisan adlaw ug

gabii, kay tingali'g adunay moilog niini gikan sa Akong mga kamot."

²⁶ Sa maong rang higayon kaniadto, nag-ingon ang mga tawo, "Sulod sa unom ka bulan, mamahimo na kining garahianan."

²⁷ Apan sa tinuod lang linibo ka mga kalag ang nakakaplag kang Cristo dinhi sa maong altar. Ug ang tabernakulo, ang bautismohanang sa kanunay. . . Nabautismohan ang mga tawo sa Ngalan ni Ginoong Jesus; nagatawag sa Iyang Ngalan, nga ginahugasan ang ilang mga kasal-anan. Gatusan ka mga bakol, mga nanag-antus, buta, kimpang, mga piang, mga giut-ut na sa kanser, ang ninghawa niining entablado; nga pagsulod nila, mga naghimalatyon na, mga kalalaken-an ug kababayen-an, mga batang lalaki ug batang babaye, ug ninghawa nga nagakinabuhi na og bag-o nga kinabuhi, uban sa bag-ong unod diha sa ilang mga lawas, ug nagalakaw na pag-usab; nga gipangbiyaan na ang ilang mga wheel chair, mga sungkod, ug uban pa. Oh Dios, sa niining traynta ka tuig sa pagserbisyo!

²⁸ Amahan, mahinumduman ko pa ang buntag nga among gipahimutang ang ulohang bato. Ug Imong gihatag ang pananawon kaniadto, nga ginapakita ang maong lugar, nga napuno ug nagkadasok gayud, usa ka maanindot nga dapit; ako—nasayod ako nga dili kana mahimong mapakyas. Busa nagapasalamat ako Kanimo tungod sa tanan niining mga butang.

²⁹ Daghan kanila ang human nang nakigbugno sa maayong pakigbugno, ug natapos ang lumba, ug gikabantayan ang Pagtoo; nga atua nahimutang didto, nagahulat, nagapahulay na karon gikan sa ilang mga paghago, ug ang ilang mga buhat naganunot uban kanila; nagahulat sa takna sa pagtingog sa trumpeta, ug aron mogula pag-usab ngadto sa bag-ong kinabuhi, usa ka bag-ong lawas. Daghan kanila ang mga tigulang na ug wala na'y kusog, ang uban mga batan-on pa, mga hamtong, ug uban pa. Apan ang Imong Ngalan pagadayegon sa tanan.

³⁰ Karon nagatindog kami dinhi pag-usab, sa atubangan sa—sa mga buhi ug sa mga patay. Nagaampo ako nga pagadihogan Mo ang Imong mga Pulong sa niining buntag. Wala ako nasayod og usa ka butang nga igasulti, apan nagaampo ako nga Imo kanang ihatag, nga diin sa kanunay Imo man gayud nga ginabuhat kini, Ginoo.

³¹ Panalangini ang among pastor, si Igsoong Neville, ang iyang asawa. Panalangini ang mga tinugyanan, ang mga hunta sa diyakono, ang matag miyembro sa lawas. Hinaut, nga managkauban, kami nga magkinabuhi gayud sa niini nga kinabuhi, aron nga sa moabot nga kinabuhi makaangkon kami og Kinabuhi nga Walay Katapusan.

³² Tabangi kami karong buntaga nga magpatul-id sa Espiritu ug sa Pulong, aron nga maandam namo ang among mga kaugalingon inig gikan namo niining mga pultahan karong

buntaga, ingon nga determinado sa among kasingkasing nga magkinabuhi og usa ka mas maayo nga pagkinabuhi kay sa kaniadto. Amo kining ginapangamuyo sa Ngalan ni Jesus. Amen.

³³ Karon, ako—bag-ohay ko lang giablihan ang Biblia dinhi, ug nahitabo kini sa pipila pa lang ka minutos ang milabay. Ania ako sa Pinadayag 3, busa magabasa lamang ko dinhi, diha sa—sa Mensahe ngadto sa Iglesia sa Laodicea.

³⁴ Ug gusto kong ipahibalo, usab, nga bag-ohay lang kong gisultihan ni Igsoong Neville; si Igsoong Parnell, nahitabo nga pagtan-aw ko diha sa ubos ug nakita ko siya nga nagalingkod dinhi, nga ania sa usa—ania sa usa ka rebaybal, nga ania lamang niining bahin sa Memphis. Diha sa—sa . . . pipila kaninyo ang nahibalo kon diin kadtong karaan nga Wimpy, kadtong baligyaanan og hamburger kaniadto, aduna siya'y usa ka—usa ka tolda nga gipahamutang didto, sa pagpaningkamot nga dalhon ang mga hinugpong ug hibaloon kung aduna ba'y nangawala nianang dalana nga gi-ordena ngadto sa kinabuhi, nga mamahimo niyang makabig pinaagi sa iyang ministerio diha kang Cristo. Ug iya kadtong gisirad-an para karong Dominggo, tungod sa mga panerbisyo nga ginapahigayon sa tabernakulo, ug—ug matinuuron kaayo ang maong igsoon. Ug gusto namo nga ipahibalo kaninyo nga pagabuksan ang mga panerbisyo sa sunod Lunes sa gabii, sa sunod semana. Ug nasayod ko nga kamong tanan kinasingkasing gayud nga gidapit didto aron madungog si Igsoong Parnell nga ginahatud ang iyang mensahe mahitungod sa gugma ni Cristo.

³⁵ Ug karon magabasa kita gikan sa Pinadayag sa ika-3 nga kapitulo, sa usa lang ka bahin, aron masulti nga atong gibasa ang Biblia. Tungod kay, ang akong igasulti mahimong mapakyas, apan ang Iyang ginasulti dili gayud mapakyas. Ug wala ako mahibalo kon diin ako magasugod, kon unsay buhaton, kon diin unsay adtoan, apan magabasa lamang ako sa Kapanahonan sa Iglesia nga Laodicea.

. . . ngadto sa manulonda sa iglesia sa . . . Laodicea isulat mo kini; Mao kini ang mga pulong sa Amen, ang kasaligan ug tinuod nga saksi, ug ang sinugdan sa mga binuhat sa Dios;

Nasayod ako sa imong mga nabuhat, . . . nga ikaw dili mabugnaw ug dili usab mainit: Kon . . . mabugnaw ka pa unta o mainit.

Ug kay ikaw dagaang man lamang, ug dili mabugnaw ug dili usab mainit, isuka ko ikaw gikan sa akong baba.

Kay ikaw magakanayon, Ako dato, ug ako nag mauswagon, ug walay nakulang kanako; ug sa walay pagpanghibalo nga ikaw alaut, . . . makalooloy, . . . kabus, . . . buta, . . . hubo:

Busa tambagan ko gyud ikaw nga gikan kanako magpalit kag bulawan nga inulay sa kalayo, aron madato ka; . . . mga maputing bisti, nga imong ikasul-ob, aron dili magdayag ang imong pagkamakauulaw sa imong pagkahubo; ug tambal nga ikapadapat sa imong mga mata, aron ikaw makakita.

Ako nagabadlong ug nagapanton, sa akong mga gihigugma: busa kinahanglan magmadasigon ka, ug maghinulsol.

36 Kabalo mo, sa dili pihong dapit dinha, samtang nagabasa ako, ako. . . Kung pasayloon ko ninyo sa makadali, ako—nakakaplag ako og usa ka dapit nga maayong paminawon para kanako, ug wala ako mahibalo kon diin na kini karon. Ania kini.

. . . ug sa walay pagpanghibalo nga ikaw. . . alaut, . . . makalooloy, . . . kabus, . . . buta, . . . hubo:

37 Oh, grabe, mora og ingon-niana ang hulagway sa iglesia sa karon! Karon, kini, ako—sa hunahuna ko nga kanang maong kapanahonan sa iglesia dinhi, nga atong ginahisgotan. . . Siyempre, ginapa-printa ko na karon ang kapanahonan sa iglesia diha sa mga libro. Apan ingon nga kining Kapanahonan sa Iglesia nga Laodicea mao ang atong gikapuy-an, ato lamang tan-awon ang kahimtang niini.

38 Dili ko gusto nga mokuha og bisan unsa nga teksto o bisan unsang butang, tungod kay dili kita. . . inato lang ako nga makig-estorya, sa dihang tan-awon nato ang paghisgot mahitungod sa kung unsa ang igapanguna kanato sa Ginoo nga pagabuhaton, apan usa ka butang nga makatabang gayud kanato.

39 Hunahunaon nato ang Kapanahonan sa Iglesia nga Laodicea ug ang kahimtang niini sa karon. Kutob sa akong nahibaloan, wala ako’y nakita nga bisan unsang butang nga makababag pa, niining orasa, sa Pag-abot ni Ginoong Jesus, gawas lamang kung andam na ang Iyang Iglesia. Sa hunahuna ko nga ang usa sa—sa mga profesiya. . .

40 Kagahapon, sa pagpadulong namo dinhi nga anaa na sulod sa sakyanan, amo kining gibiyahe og duha ka adlaw, gikan sa Tucson, paingon dinhi, duha ka libo ka milya mismo, ako ug si Billy. Ug mao nga kami, karon, dili kadto paglapas sa unsa man nga balaod sa kakusog sa pagpadagan. Nagpabilin kami sa eksakto lang. Nagalingkod ako didto, kung siya ang nagadrayb, ug ako—gipataas ko—gipataas ang akong mga kumo sama sa usa ka shotgun nga kasado na. Pagmakita nako siya nga minglapas. Miingon ko, “Hinay-hinay lang, dong.”

Karon, gikasultihan kita, “Ihatag kang Caesar ang kon unsay iya ni Caesar.”

41 Dayon pag-abot namo dinhi kagabii, may usa ka gamay'ng batang babaye nga nagbuy-od didto sa dalan, mga tulo ka tuig ang panuigon; patay ang inahan niini didto sa kanal. Tungod sa usa ka hubog nga lalaki, nga gikan pa sa R.O.T.C., dise-otso anyos ang panuigon, nga nagmaneho og usa ka gatus ug baynte ka milya kada oras, nga anaa sa wala nga bahin sa kalsada, ang nakapatay. Ug siguro siya'y naghimalatyon, usab. Dinha ninyo maamgo kung unsa kini.

“Ihatag kang Caesar ang kung unsa'y iya ni Caesar.”

42 Inosente nga mga tawo ang nangamatay. Usa ka tres anyos nga batang babaye ang nawad-an og kinabuhi, tungod sa usa lang ka hubog nga sundalo, kita n'yo, nga nagdrayb og usa ka gatus ug baynte ka milya kada oras, mga ingon-ana, diha pa sa sayup nga bahin sa dalan. Pasaka ngadto sa bungtod, ug gibangga sila didto, ug nangamatay silang tanan dihadiha mismo. Ako . . . Himalatyon na usab siya. Busa unya nakita n'yo, bisan pa ang maong mga inosenteng tawo nagbantay . . .

43 Karon sad-an kadtong lalaki sa walay-kalooy nga pagpatay. Kita n'yo? Sa hunahuna ko nga pagmadakpan ang usa ka tawo nga naga-drayb diha sa dalan, nga hubog, kinahanglan nga napulo ka tuig ang isilot kaniya, sa untop, tungod sa . . . tinuyo nga pagpatay; si kinsa man siya, tungod kay siya . . . ang si bisan kinsa nga tawo.

44 Kita, wala gyud kita'y bisan unsang maayo nga mabuhat pinaagi sa pulitika. Daut na kini. Ang ideya sa Dios nga magbaton og hari, usa ka matarung nga hari, husto man. Apan milapad na og ayo ang pulitika, mahimo mo nang mapalit ang bisan unsa; manglimbong, mamakak, mangawat, ang tanang uban pa. Sama sa akong gisulti pipila na ka Dominggo ang milabay: ug tan-awa ninyo kung diin na kamo, kita n'yo, wala na'y lain kondili usa ka hewing tipun-og sa tanan nga butang. Apan ang usa ka matarung nga hari makahimo sa kaugalingon niyang mga balaod. Ug mahimo mo nga mopatay og tawo; kung kabalo kang mamulitika, okey lang kana, makaikyasa ka ra niini. Kita n'yo? Ug busa, kini maoy, kini—kini . . .

45 Maayo man nga ideya ang demokrasya, apan dili kini magpulos. Sama lang sa komunismo, managsama ra ang tanan sa pagpanag-iya og mga kabtangan; maayo man kining paminawon, apan dili kini magpulos. Dili. Ang . . . Ang paagi sa Dios nga magkaaduna og hari, sama kang David kaniadto, maoy husto, ug aduna ka'y usa ra ka hunahuna nga nakasentro. Sama sa usa ka lider ug usa ka pundok sa mga gangsa, o uban pa, dili mo puede nga kuhaong lider ang duha o tulo kanila. Kung ingon-niana, magkagubot mong tanan, pagmaghunahuna mo og unsa man nga ideya.

46 Busa atong makita ang mga kahimtang, sa karon, nga andam na alang sa Pag-abot sa Ginoo.

47 Apan, samtang si Igsoong Neville ug ako, ug kining uban pa nga mga igsoong lalaki nga nagapaningkamot sa pagpastol sa usa ka panon, aduna ako'y butang sa akong hunahuna karon, nga nagaabot, nga mahimo natong pagahisgotan.

48 Kana maoy, nakadawat ako og sulat niadtong miaging adlaw gikan sa usa ka buutan nga gining. Wala ko kadto diretsong nadawat; miagi kadto sa usa pa ka tawo. Ug iya akong gibatikus og ayo, o gipanguhaan gyud nga batikuson ako. Nag-ingon, "Inyo na ba sukad. . . Wala ba kamo'y mahimo nga mga Christian Business Men aron ipaundang si Igsoong Branham?" Miingon, "Tungod kay iya nang gipagawas karon kining libro nga gitawag og *Ang Kapanahonan sa Iglesia sa Laodicea*, nga nagaimprinta pa og dugang." Ug miingon, "Iyang ginabatikos pag-ayo ang Pentecostal nga doktrina." Miingon, "Karon nagahisgot na usab siya nga ang pinaka-ebidensiya kono dili mao ang pagsulti sa laing mga dila." Ug miingon, "Dayon, batok usab siya sa mga babaye nga magwawali." Ug usa kadto siya ka babaye nga magwawali. Ug ang iyang mga batang lalaki, maoy pipila sa mga pinakasuud nga higala nga nagkaaduna ako sa kalibutan. Siya. . . Usa sila sa mga pinakasuud nga higala nga nagkaaduna ako. Ug miingon siya, "Karon. . ."

49 Ug kining lalaki ug ang asawa niini, nagapamahaw ako kaniadto uban kanila; miingon sila, "Igsoong Branham, tan-awa kini. Unsay hunahuna mo niini?" ug gihulbot ang usa ka sulat.

Miingon ko, "Bueno, igsoong babaye, wala lang gayud siya makasabot."

50 Giingnan ako sa maong mga batang lalaki nga ang ilang inahan usa ka babaye nga magwawali, ug mao nga wala siya miuyon sa Mensahe.

51 Ug karon nagaingon siya dinhi, miingon siya, "Karon miingon siya, 'Kinahanglan walay pagbulut-an ang mga kababayen-an sa mga kalalaken-an.'" Miingon, "Unsaon man usab si Febe sa Biblia, nga katabang ni Pablo?"

52 Oo, usa man siya ka tigbaligya og mga produkto. Ug mihangyo si Pablo sa mga tawo. . . Sa hunahuna n'yo moingon kaha si Pablo, "Ang mga babaye kinahanglan magpakahilum sulod sa mga iglesia, wala itugot kanila ang pagsulti," ug moliso ug moingon, "Karon, si Febe, nga akong katabang sa Maayong Balita, magawali siya sa pipila ka gabii"? Aba, pagasupakon niya ang iyang kaugalingong pulong. Kita n'yo?

53 Ug nag-ingon, dayon, nga labaw pa kono niini (Nagatoo ko nga si Ester kadtong iyang gipahinungdan, nga usa sa mga maghuhukom sa Biblia kaniadto.), miingon, "Usa ka babaye ang nahimong usa ka maghuhukom sa Biblia kaniadto. Dili ba diay kadto pagbulut-an sa mga lalaki!"

54 Ug kining negosyante nga lalaki nga naayo dinhi mismo sa iglesia dili pa lang dugay, miingon siya. . . Karon, ang

iyang asawa miingon, “Igsoong Branham, kanunay kana nga nakapalibog kanako kaniadto pa.”

Miingon ko, “Aba, igsoon, naunsa ba nga nagpalibog man kana kanimong?”

Miingon, “Bueno, ania ang usa ka babaye nga maghuhukom.”

⁵⁵ Ingon ko, “Pulitika kana, dili ang iglesia. Wala kana’y bisan unsa man nga kahilambigitan sa iglesia.”

⁵⁶ Miingon si Pablo, “Managpasakup sila, sumala usab sa ginaingon sa kasugoan.” Ug ang kasugoan dili puede nga magbutang og usa ka babaye nga mamahimong usa ka sacerdote; dili kini puede. Wala gyud kamo’y makita og usa ka babaye nga labaw’ng sacerdote. Wala gyud kamo’y makita og babaye nga usa ka sacerdote, wala gayud diha sa Biblia. Wala gyud kamo’y makita og usa ka babaye nga magwawali, diha sa Biblia. Sigurado gayud.

⁵⁷ Ang pipila kanila mga babayeng propeta, ug uban pa; si Miriam ug ang uban pa. Ug si Ester . . . Ang usa kanila usa ka maghuhukom sa Israel kaniadto. Usahay kaniadto mga reyna sila ngadto kanila, ug uban pa nga sama niana, hari ug reyna. Pagmamatay ang hari, kinahanglan nga mopuli ang reyna sa lugar niya hangtud nga makapili sila og usa na usab ka hari, ug uban pa.

⁵⁸ Sa—sa Tucson, Arizona, aduna kami usa ka babaye nga maghuhukom didto sa siyudad. Mao kana ang hinungdan nga hugaw kaayo ang maong siyudad. Ug aduna kami . . . Wala gayu’y katungod ang babaye sa pulitika. Wala siyay katungod diha sa . . . sa bisan unsa man nga pagbulut-an sa iglesia.

⁵⁹ Ang iyang katungdanan mao ang mahimong reyna sa lalaki diha sa panimalay. Gawas niana, wala na siya’y bisan unsa pa. Ug nasayod kita nga mao kana ang Kamatuoran. Dili gayud kamo makakaplag . . . Kahibalo ko nga kinaraan kana kung paminawon, apan aduna gayud ko’y tulubagon.

⁶⁰ Ug nasayod ko nga, human sa akong pagbiya niini nga yuta, magapadayon kana nga mga teyp ug kana nga mga libro, ug daghan kaninyo nga mga gagmay’ng kabataan ang mahibalo, sa umalabot nga mga adlaw, nga kini mao gayud ang Kamatuoran, tungod kay gipangsulti ko kini sa Ngalan sa Ginoo.

⁶¹ Karon, nangahibulong kita kon giunsa nga ang usa ka babaye, nga usa ka maayong babaye, ug nanganak siya sa ibabaw niining yuta uban sa iyang maunungon nga bana, usa ka maayo nga lalaki, og pipila sa pinakabuutan nga mga batang lalaki nga akong sukad nahimamat, mga lalaking, nga akong sukad nahimamat. Ug sa gilayon, dihadiha sa pagkadungog nila sa Mensahe, mitoo sila Niini, sa usa ka gatus ka porsyento.

Karon, mahimong moabot lamang kana pinaagi og pagkatagana nang daan, ang bugtong paagi lamang nga mahitabo kini.

⁶² Karon, ang pangutana, dinhi. Naghunahuna ako nga, kita n'yo, kon nganong ginapahibalik kini kanako sa Ginoo karon. "Ug nahibalo niini, nangahibalo. . . Wala mahibalo niini; nga ikaw hubo, makaluluoy, alaut, buta, ug wala mahibalo niini."

⁶³ Sa dili pa ako modangat sa niana nga bahin, tingali mohatag ako og hamubo nga pagsaysay sa akong gisulti pipila pa lang ka adlaw ang milabay, dinhi sa usa ka Mensahe mahitungod sa, nagtoo ko nga kadto mao, *Ang Dios Sa Niining Kalibutan*; nga gibutahan ang mga mata sa mga tawo, nga bug-os na nilang ginasimba ang yawa sa relihiyosong mga buluhaton. Nakuha ba kana ninyong tanan? Nakasabot ba mong tanan niini? [Nagaingon ang kongregasyon, "Amen."—Ed.]

⁶⁴ Ug dayon sa niadtong mao ra nga Mensahe, akong gihisgotan ang hiligostanan, nga, ang usa ka babaye nga nagasuot og mahilas nga mga bisti, malaw-ay, siya'y, pagahukman sa Korte sa Paghukom ingon nga usa ka bigaon sa dalan. Makalilisang kana paminawon.

Tugoti akong ihulagway diha kaninyo.

⁶⁵ Karon, ania ang usa ka abogado sa siyudad, nga usa ka batan-ong lalaki, ug usa siya ka buutan nga lalaki. Kung sa—sa pulitikanhong pamaagi, makita ko nga tingali disente siya sama kang kinsa man, diha sa iyang pagka-pulitiko. Ug dayon nagpakig-uban siya sa usa ka babaye nga ilado kaayo. Nagkahigugmaay sila ug nagminyo. Nagaadto sila sa tanan nga mga party-party ug sa dagkung mga butang, ug magkauban silang gainum-inom. Sa katapusan, siya. . . Aduna siya'y maanindot nga balay. Nagpuyo siya sa usa ka maanindot nga lugar. Hataas ang tan-aw kaniya sa mga tawo. Apan siya. . . Pareho silang nagahuboghubog. Ang asawa nagasul-ob og mga short, nagapaputol sa iyang buhok, nagameyk-ap, ang tanan na aron mamahimong seksi, maanyag nga babayeng ginapasundayag ang iyang kaugalingon. Bueno, wala siya nagasimba, man lang, ni ang usa man kanila.

⁶⁶ Dayon, adunay mibalhin sa tapad nga balay nila, usa ka babaye nga gikan sa iglesiang Baptist o sa iglesiang Methodist, siya ug ang iyang bana. Karon, kining babaye. . .

⁶⁷ Himoon nato kining Methodist, tungod ang Methodist medyo mas nagatoo pa sa pagkabalaan kay sa Baptist; ang tanan gawas lang sa mga New Testament Baptist, nagatoo sila sa pagkabalaan. Apan, kasagaran, ang mga Baptist wala gayud nagatoo sa pagkabalaan, kita n'yo. Wala sila nagatoo sa ingon nianang butang. Busa kon ingon-ana, karon, himoon nato kining Methodist tungod kay nagatoo man sila sa pagkabalaan.

⁶⁸ Ug bueno may usa ka babayeng Methodist ang mibalhin sa tapad nga balay sa niining babaye, sa mao ra usab nga

kalye. Ang iyang bana usa ka . . . ingnon na nato nga usa siya ka public accountant, ug, o kung unsa man nga propesyon. Bueno, ang kining babaye nga Methodist ginapanid-an kining usa ka babaye.

⁶⁹ Ug pagmoadto sa gawas sa lungsod ang kining abogado. . . Ang iyang ngalan mao si John; ingnon na nato nga ang iyang ngalan mao si John. Karon, ayaw pagpamasin bahin niana ha. Nagagamit lamang ako og tinumotumo nga mga ngalan karon. Ug ang iyang ngalan mao si John. Bueno, nagapakig-uban ang maong babaye kang Ralph kaniadto. Ug tinumotumo lang kana nga ngalan, kining tanan, kita n'yo, aron lang nga masabtan ninyo ang maong estorya, aron sa paghulagway niini.

⁷⁰ Bueno, mahibaloan mo na lang, diha sa usa ka paghuboghubog nga party, gigakus siya pag-usab ni Ralph. Bueno, nanginit ang maong babaye, tungod nahigugma na pud siya kang Ralph, sa hunahuna niya. Dayon, sa wala madugay, nagsugod na nga mopagkigkita si Ralph kaniya. Ug mahimo ra niya kadtong ilimod kang John, gitago kini kaniya. Ug naghunahuna siya nga maalista kaayo siya, tungod mahimo man niyang magpakig-uban kang Ralph, bisan minyo siya kang John. Kita n'yo, wala man lang og taras sa kaligdong ang maong babaye, ug wala man lang niya gihunahuna kadto.

⁷¹ Apan kining babayeng Methodist mas hataas nga kategorya ang naabot. Siya, bisan pa man, nagasimba gyud, ug sa tan-aw niya mangil-ad kaayo kadto nga babaye. Aba, ginasulti niya sa iyang bana, pagsulod niini, "Makita ko kana nga lalaki nga nagasulod dinha ug nagapakigtagbo kaniya. Ug kon molakaw si John para sa usa ka kaso sa kung diin man, sa Philadelphia o kung diin man, dalhon niya kining babaye sa gawas gamit ang iyang sakyanan, ug manghigda sila didto sa baybay. Makita ko sila pagnanguli na; og dili man lang gani birahon paubos ang mga kurtina usahay, makita kining ginahalokan siya ug nagapakigkari-karinyo kaniya, unya. . . Oh, dili ba pagkangil-ad niana?" ang ingon niya sa iyang bana. "Aba, siya wala na'y lain kondili usa ka dayag na gyud nga bigaon." Tinuod kana. Siya maoy labi pang dautan kay sa usa ka dayag nga bigaon, tungod kay siya usa man ka minyo na nga babaye. Kita n'yo? Ug siya, kining babaye, kining babayeng Methodist, nagahunahuna nga mangil-ad kaayo kadto, wala pa gyud nakasimba kadto nga babaye.

⁷² Karon, kining babaye nga Methodist dili gayud mobuhat og ingon nianang butang. Dili, gayud. Siya usa man ka disente nga babaye. Ug usa pa, dili usab siya mohikap og bisan usa ka tipik sa bino, tungod kay, ang iglesia sa Methodist, nubenta porsyento sa ilang programa mao ang pagdumili batok sa bino, batok sa bino. Busa, aduna sila og programa sa pagdumili, ug silang mga miyembro nianang iglesia sa Methodist wala sila nagakinabuhi nga lagpas kay sa ginatudlo nianang iglesia.

⁷³ Apan kining mao ra nga babaye, kining babaye nga Methodist, mogawas, inig kagabii, uban ang iyang bana, nga nagasul-ob og short inig ka Dominggo, inig-kahuman sa Sunday school. Ginapaputlan niya ang iyang buhok. Nagalipstick siya, ug nagapanigarilyo pa gani diyutay.

⁷⁴ Karon, diha sa Pulong sa Dios, pareho ra man sila nga mga bigaon, apan ang *kinig* usa dinhi maoy “hubo, makaluluoy, alaut, buta, ug wala mahibalo niini.” Ang usa sad-an usab nga sama ra sa usa, kay, “Ang usa ka lalaki nga nagatan-aw sa usa ka babaye, sa pagkaibog kaniya, nakapanapaw na uban kaniya sa iyang kasingkasing.”

⁷⁵ Ug kung ang kining babaye, karon, moingon siya, “Hulat sa kadali, Mr. Branham. Pasabton ko ikaw, nga ako dili bigaon.” Igsoon kong babaye, bisan dalhon ka pa atubangan sa usa ka Biblia, ug ipatong pa ang imong mga kamot ibabaw Niini sa Presensiya sa Dios, ug magapanumpa nga nagmatinud-anon ka gayud, nagmatinud-anon ngadto sa imong bana kutob sa imong mahimo. Ang imong lawas panag-iyu kana sa imong bana, apan ang imong kalag panag-iyu kana sa Dios. Aduna gayu’y dautang espiritu nga nagdihog kanimo. Kung ingon-ana, kung dili man, nan ikaw . . . mahimo kong pamatud-an nga nabuang ka na gayud.

⁷⁶ Unsa kahay nahitabo sa imong lola kaniadto kung nagalakaw-lakaw siya didto sa dalan nga nagasul-ob og short? Siguradong gibalhog na nila siya sa institusyon sa mga buang; kung mogawas siya nga wala siya nakasinina. Aduna gayud siya’y problema sa pangutok. Kung ingon-niini kini kaniadto, ingon-niini usab kini sa karon.

⁷⁷ Busa ginadala niini ang tibuok kalibutan ngadto sa pagkabuang. Nabuang na ang tibuok butang. Ug hinay-hinay gayud kining nakasulod hangtud nga ang mga tawo wala na mahibalo niini.

⁷⁸ Karon, usa ba siya ka bigaon? Dili sa iyang bana, og sa iyang panaad sa iyang lawas. Kondili, sa atubangan sa Dios, aduna siya og dautan, bigaon nga espiritu diha kaniya, nga nagahimo kaniya nga magbisti og ingon-niana. Ug ania siya sa Kapanahonan sa Iglesiang Laodicea, ug wala nahibalo nga ginahubat niya kana. Ang maong inosente nga babaye wala gayud mahibalo nga pagahukman siya sa Dios ingon nga usa ka bigaon. Tan-awa.

⁷⁹ Kung ipahibalo Kini kaniya; dili mo siya mahimong masultihan. Wala na’y paagi nga maipahibalo mo Kini kaniya. Ang Biblia miingon, “Mga hubo sila ug wala mahibalo niini.”

⁸⁰ Kung tawgon mo siya nga usa ka bigaon, sa personal, ipaaresto ka niya. Buhaton gayud niya. Wala gyud ko’y gihisgotan og personal mahitungod ni kinsa man. Nagahisgot ako mahitungod sa sala. Wala ako nagasulti, “*Kini* nga iglesia,

si Mr. *Ingon-ani-ug-ingon-ana* didto, si Rev. *Ingon-ani-ug-ingon-ana*, usa siya ka . . .” Wala, wala. Ginasulti ko nga, ang doktrina niana, kita n’yo, ang kinatibuk-ang butang. Wala ako nagasangpit og indibiduwal. Dili kini ang mga indibiduwal. Kini mao ang sistema nga gikahimutangan nila. Ang sistema kini sa kalibutan.

⁸¹ Si Igsoong George Wright nga nagalingkod dinhi . . . Setentay-singko na siya o setentay-otso anyos na ang panuigon, sa akong banabana. Unsa kaha sa hunahuna mo ang nahitabo kaniadto kung miadto ka ug nakita si Igsoong babayeng Wright usa niana ka adlaw, ug nagatindog siya nga nagsul-ob og short? Aba, dili mo gayud, imong—imo na siguro nga gipapriso ang maong babaye. Wala mo siguro siyang gipakaslán. Bueno, kung ang si bisan kinsa man nga lalaki niadtong panahona ang mibuhat niadto, siguradong mao usab ang mahitabo sa karon. Bueno, kung sala man kini ug sayup gayud kaniadto pa, mao ra sa gihapon kini sa karon; apan misamot pang nangabuang ang mga tawo sa karon.

⁸² Tugoti ako nga magproposiya og usa ka butang kaninyo, sa dili pa man kini mahitabo. Ang tibuok kalibutan nagkagrupo-grupo na sa pagkabuang, ug nga mas magkagrabe ug magkagrabe ug magkagrabe pa gayud, hangtud nga mamahimo na silang grupo sa mga buang. Ug halos ingon na niana kini karon.

⁸³ Mahunahuna ba ninyo ang usa ka lalaki nga nagadrayb nga palong ang iyang mga suga, diha pa gyud sa sayup nga bahin sa dalan; usa ka ricky, batan-on, gidahum nga bag-ohay lang mihuman og high school, mipatay og pipila ka mga tawo. Nagpahunong ba kana kanila? Adunay usa na usab nga nagasunod kaniya, nga ginabuhat ang mao rang butang. Mahunahuna ba ninyo ang usa ka batan-ong lalaki nga maghunahuna og unsa man sa iyang kaugalingon. . .og unsa man sa iyang kaugalingon, nga moanhi ug buhaton ang mga butang sama sa ginabuhat nila?

⁸⁴ Mahunahuna ba ninyo ang usa ka batan-ong babaye, ug ang usa nga nagasugod na sa pagkadalaga, matahum, maligon, maayo og lawas, matahum, nga nawong, og maanyag gayud; ug kini mismong iyang pagkamaanyag nagapakita lang nga ania na kita sa katapusang panahon. Kita n’yo, mipaingon na gayud siya ngadto sa pang-kalibutanong panagway, sa kalibutanon nga mga butang ug dili sa katahum sa pagkabalaan, sa kalumo sa iyang kalag. Nakakita na ako og mga babaye, nga diha sa gawas nila wala gayu’y bisan unsa nga pagatan-awon, apan pagpakig-istorya kanila sa usa ka higayon, pagpakig-istorya kanila sa kadali, sila’y tinuod gayud nga butang nga dili mo mabiyaan. Kita n’yo, ang pang-gawas nga kaanyag iya sa yawa, iya kini sa kalibutan.

⁸⁵ Tan-awa ninyo ang mga anak ni Cain, kung giunsa nga napaingon sila niini. “Sa dihang ang mga anak nga lalaki sa Dios nakita ang mga anak nga babaye sa tawo nga maanyag, sila nagkuha alang kanila ug mga asawa,” ug wala gayud sila gipasaylo sa Dios.

⁸⁶ Tan-awa, kadtong Israelinhon nga mga kababayan-an ang—ang ilang mga kamot kubalon na, ug kalkag pa gyud ang mga buhok; pero sa diha nga ang mga anak sa Dios nakaabot didto sa yuta sa Moab, ug nahinagbo kadtong maanyag nga mga babaye didto nga plastado kaayo ang mga buhok, ug magarbo, ug daghang mga pintal sa ilang mga nawong, o kon unsa ma’y tawag ninyo niini; ug sa dihang nakita niadtong mga anak sa Dios kadtong maanyag kaayo nga mga babaye, miingon ang usa ka mini nga propeta, “Kitang tanan managsama ra.” [Ginadukdok ni Igsoong Branham ang ibabaw sa pulpito sa makaunom ka higayon—Ed.] Ug nagkigminyo sila sa mga niini, ug wala gayud sila gipasaylo sa Dios.

⁸⁷ Nangamatay sila didto sa kamingawan. Ang matag usa kanila namatay didto, nga walay paglaum, nga walay Dios, ug nangalaglag gayud sa Walay Katapusan; hinukman na hangtud sa kahangturan, bisan pa og nakita na nila ang kaayo sa Dios, bisan pa og nakainom na sila sa tuburan nga dili gayud mamala. Nanginom na sila gikan sa hinampak nga bato. Nakita na nila nga mibuhay og mga milagro ang tumbaga nga serpente. Migawas sila gikan sa pagbautismo ni Moises sa dagat. Nakita na gayud nila ang kamot sa Dios. Mikaon na sila sa pagkaon sa Manulonda, ug nabuhay kadtong tanan nga mga butang. Apan nakigminyo, gitugotan nga makasulod kadto nga mga babaye, ug magkigminyo sa mga niini. Wala nanagpanapaw, nakigminyo lamang kanila; og wala gayud kini gipasaylo sa Dios.

⁸⁸ Mao na kana ang ikaduhang higayon nga nagtagbo kini. Karon ania na kita sa ikatulo nga higayon, nga mas labi pang malimbongon kay kaniadto.

⁸⁹ Nasayod ko nga bug-at kana. Ug kanunay kong gihunahuna, sa makadaghan nga paagi, kon unsaon na man kini? Nganong kinahanglan ko man makigsulti og diretsahan sa mga tawo? Unsa may nakapahimo niini? Ug bisan pa man, nahimatikdan ko, nga kung dili kadto’y Dios, wala gayu’y si bisan kinsa, walay ni usa ka babaye ang molingkod ug maminaw kanako. Apan nagapamalik sila, tungod kay aduna may mga tawo nga aduna kanila og angkla sa Kamatuoran, ang nahibalo nga husto Kana. Bisun unsa pa man, nahibalo gayud sila nga husto Kini. Karon bantayi kung unsay mahitabo. Nasayod ko nga mabug-at kini.

⁹⁰ Sama lang kini nga kung hatagan ikaw sa doktor og tambal, ug mibalibad ka nga tumaron kini, nan dili mo pagabasulon ang doktor kung mamatay ka. Ug susama Kini sa tambal. Unsa na man ang bahin niining mga tawo nga kanunay’ng nagasulti nga madulomtanon kono ako sa mga babaye?

⁹¹ Nakita n'yo, tan-awa lang ninyo kung unsa na manglihok ang mga kababayen-an, ug ipakita ko diha kaninyo kon diin na ang iglesia. Ang moralidad sa mga kababayen-an anaa na sa pagka-Laodicea, diha sa kalibutan, sa pisikal, “hubo, makaluluoy, buta, ug wala mahibalo niini,” ang—ang mga katawhan, ang mga kababayen-an sa kalibutan. Ug anaa na usab ang iglesia sa nianang mao ra nga kahimtang. Bantayi ang natural nga nagakatipo sa espirituwal, sa kinatibuk-an, sa matag panahon. Karon, sa umalabot nga adlaw didto sa Korte sa Paghukom. . .

⁹² Nahibalo ako nga dili kini angay'ng isulti. Ug kung ang usa ka tawo wala gi-ordena sa pagsulti niini, mas maayo pa nga dili mo na isulti kini; tungod kay nagasundog-sundog ka lang, ug kon ingon-ana, sigurado gayud nga magkaproblema ka.

⁹³ Karon himatikdi. Sa tinud-anay nahimo na nako, nga medyo, may mga higayon, nga napanganga ko na ang baba sa usa ka babaye ug gibubo ang Tambal sa iyang baba, ug dayon gitabon ang akong mga kamot sa iyang baba, ug ginaluwa niya Kini sa matag higayon. Unsa kaha kon gibuhat kana sa doktor ngadto sa usa ka pasyente, dayon namatay ang pasyente tungod nga nagdumili sila nga tunlon ang maong tambal? Sa Korte sa Paghukom, sa diha nga ang tanan niining mga butang sama sa pagpaputol og buhok ug pagsul-ob og mga short ug. . .

⁹⁴ Nagatukod lang ako. Haduol na gayud ang takna nga makita na ninyo ang usa ka butang nga mahitabo, sa diha nga mahitabo na ang usa ka butang. Ug ang tanan niining mga butang dinhi pagpahamutang lamang og usa ka pundasyon alang sa usa ka hamubo, og madali nga Mensahe nga magatay-og sa tanang mga kanasuran.

⁹⁵ Nganong ginasaway ko man ang mga kababayen-an, pagpahamutang lamang kini og usa ka butang nga mahimo mo nang igoon ang ulo, pinaagi niini. Ginapaningkamotan pa gani nga isulti kanila ang kung unsay husto. Ug ginaduot ko pa ang usa ka kamot nga sama *niini*, ingon nga mao kini ang baba, ug ginaluwa nila Kini sa gihapon. Kung ingon-ana kinsa ba'y makabasol sa doktor?

⁹⁶ Unsaon man ninyo pagpanubag, didto sa Adlaw sa Paghukom, nga ang mismong mga tingog nga nanagsinggit batok niini, ipatingog ang maong rekord mismo diha sa atubangan sa mga tawo? Kung ingon-ana unsaon man nila sa pagka-ikyas niini?

⁹⁷ Ginaluwa Kini sa tunga mismo sa imong mga tudlo. Dugangan pa pagpainom, dayon sa katapusan ilingo-lingo ang ilang ulo ug mobalibad na, ug kung utrohon mo, ayaw gayud nila. Apan bisan pa man, mobalik ka pa gihapon ug ipainom Kini pag-usab. Kon ingon-ana kinsa man ang basulon? Dili ang doktor, dili ang Tambal, kondili ang batasan sa maong tawo.

Eksakto gayud kana. Mamahimong usa kini ka makalilisang nga adlaw, usa sa niini nga mga adlaw, sa dihang patindogon na kining makasasala ug mananapaw nga henerasyon sa atubangan sa Dios nga Makagagahum sa tanan.

⁹⁸ Nakita ko nga hinayhinay na akong nagakatigulang, nagatikubo na ang akong mga abaga; ug, nahibalo ako, nga traynta ka tuig na ko dinhi niini nga entablado, oo, traynta'y tres ka tuig na niining natad. Usa na kana ka hataas nga kinabuhi. Trayntay-tres na ka tuig kana nga pagpangalagad. Aduna lamang ko'y usa ka pagbasol; nga wala ako nagkaaduna og usa ka gatus ug traynta'y tres ka tuig para niini. Tungod kay mao na man kini ang katapusan nga kahigayonan nga aduna ako, samtang ania pa dinhi nga mortal, aron nga iwali ang Maayong Balita. Hinaut nga tabangan ako sa Dios nga mobarug nga matinuuron gayud kutob sa akong mahimo, sa nianang Pulong, ug isulti lamang kung unsay Iyang ginasulti.

⁹⁹ Unsa ma'y nakapaingon nianang babaye nga Methodist. . . Unsaon mo man nga maipahibalo Kini kaniya? Ania siya, sa niining Kapanahonan sa Iglesia nga Laodicea.

¹⁰⁰ Karon pagahisgotan nato ang babayeng Pentecostal. Kinahanglan dili siya magsul-ob og short, magmake-up, o magpapatol sa iyang buhok, apan ginalingi niya ang maong Methodist, nagaingon, "Tan-awa kana nga babaye nga ginabuhat ang *ingon-niini-ug-ingon-niana!*" Ingon sa maong babaye nga wala siya nagasul-ob og short, pero siya. . . ug siya mismo mubo ang buhok. Kita n'yo?

¹⁰¹ Sa dihang nagasaka ka pataas diha sa Dios, mas labi pang makasasala kon tan-awon kini nga mga butang. Ug dayon usahay, diha sa pag-ampo, makita mo, sa dihang ginadala ka na sa Balaang Espiritu ngadto sa hataas nga dapit, kaguliyang ang hitsura sa maong tibuok butang. Dayon inig naug mo balik sa ubos, daw susama ka, sa usa ka mabangis nga tawo, ngadto sa mga tawo, nga ikaw—ikaw walay lain kondili usa ka mahalang manulti nga tigulang. Usa na kono ikaw ka buang, tungod nga nagabarug ka ingon nga daw sa usa ka sapoton nga tigulang ug pirme na lang ginabadlong ang mga tawo. Apan kung makasaka lang kamo ngadto sa maong mga dapit sa usa ka higayon, kon diin maanaa kamo sa Presensiya sa Dios (dili tungod sa emosyon, kondili tungod sa tinuod gyud nga pagpataas sa Balaang Espiritu), nahisulat kining tibuok butang ingon nga, "ICHABOD." Ang Himaya sa Ginoo mibiya na sa tanang mga denominasyonhong pundok. Husto kana. Wala gayu'y bisan usa nga husto diha kanila.

¹⁰² Karon moporma ako kaninyo og usa ka gamay'ng lingin. Kung aduna ako'y pisara. . . Apan gusto kong tan-awon ninyo dinhi. [Ginaporma ni Igsoong Branham ang sumusunod nga mga lingin bahin sa usa ka butang—Ed.] Mohimo ako og usa ka lingin nga ingon *niini*, ug mohimo ako og usa na usab ka lingin sa sulod

niana nga lingin, duha na kana, dayon mohimo na usab ako og usa pa ka lingin sa sulod niana nga lingin. Tulo na kana nga mga lingin, tulo ka mga lingin. Karon, ingon niana ikaw.

¹⁰³ Ingon niana ang Dios. Ang Dios diha sa trinidad Usa ra, ug kung walay trinidad dili Siya Dios. Dili gayud Siya maipadayag sa unsa man nga ubang paagi.

¹⁰⁴ Ug dili usab ikaw mahimong madayag kung dili sa trinidad nga persona nga mao ikaw, kana mao ang: lawas, espiritu, ug kalag. Kung wala ang usa sa mga niini, dili ka gayud kumpleto. Kita n'yo? Kung ikaw walay kalag, mamahimo kang walay pulos; kung ikaw walay espiritu, mamahimo kang walay pulos; kung ikaw walay lawas, mamahimo ka lamang usa ka espiritu, dili nga usa ka lawas.

¹⁰⁵ Busa, kumpleto ang Dios diha sa tulo-ka-kahiusahan sa usa ka Persona; dili nga tulo-ka-kahiusahan sa *mga persona*, kondili Usa ka Persona diha sa tulo-ka-kahiusahan. Ang Amahan, Anak, ug Espiritu Santo mao ang usa ka nadayag nga tinuod nga Dios. Ang Dios mismo!

¹⁰⁶ Himatikdi dinhi, hulat lang, ako—nagtoo ko nga ako na kining gibasa pipila pa lang ka minutos ang milabay. Paminawa ninyo kini.

...ngadto sa manulonda sa iglesia sa...Laodicea isulat mo kini; Mao kini ang mga pulong sa Amen, ang kasaligan ug tinuod nga saksi, ang sinugdan sa mga binuhat sa Dios;

¹⁰⁷ Ang Dios mao ang Magbubuhat. Ug giunsa man Siya pagbuhat? Apan mao kini, “ang sinugdan sa pagbuhat sa Dios.” Sa dihang ang Dios, ang Espiritu, gibuhat sa porma sa usa ka Tawo, kadto mao ang Dios nga gibuhat kaniadto; ang Dios nga Magbubuhat, ang Iyang Kaugalingon mismo, nahimong usa ka binuhat. Ang Dios, Nga naghimo sa yuta, naghimo sa calcium, naghimo sa potash, sa pangkawanangan nga kahayag, sa mga petrolyo, gitipon ang maong mga butang ug gibuhat ang Iyang Kaugalingon, sa “ang sinugdan sa pagbuhat sa Dios.”

¹⁰⁸ “Ang Amen,” ang panghinapos. Ang *Amen* nagakahulogan og “hinaot unta.” “Ang pangkatapusan sa Dios,” sa diha nga nakumpleto ang Dios sa Iyang binuhat.

¹⁰⁹ Karon, giunsa man kadto? “Wala pa gayu’y tawo nga nakakita sa Dios, kondili ang Bugtong Anak sa Amahan mao ang nagpaila Kaniya.” Nasabtan ba ninyo kini?

¹¹⁰ Bueno, kadali lang, ayaw kamo pagdali. Ablihon nato sa Mga Taga-Colosas, sa kadali lang. Nahitabo nga akong... nahinumduman ko ang usa ka Kasulatan. Ablihon nato ang Mga Taga-Colosas, ang Basahon sa Mga Taga-Colosas, ug kuhaon ang... Nagtoo ko nga sa unang kapitulo kadto. Kinahanglan kong tan-awon kini, tungod kay wala kini naapil sa mga gilista

ko. Busa akong. . . Sama kanako kaniadto, sa dihang usa pa ako ka batan-ong magwawali, mahimo nakong mahinumduman kini nga mga butang [Ginapalagitik ni Igsoong Branham ang iyang tudlo—Ed.] karon dayon, apan samtang nagakatigulang na ko dili ko na kini mahimo. Magsugod kita diha sa ika-9 nga bersekulo, sa hunahuna ko. “Tungod niini. . .” Ginasultihan ni Pablo ang Mga Taga-Colosas mahitungod kang Cristo, kon si Kinsa Siya.

Tungod niini kami usab, sukad sa adlaw sa among pagkadungog niini, wala kami maghunong sa pag-ampo alang kaninyo, ug. . . sa pagpangayo aron kamo mapuno sa tibuk kahibalo sa iyang kabubut-on diha sa tibuk nga espirituhanong kaalam ug pagsabot.

Aron kamo magakinabuhi nga takus sa Ginoo nga sa hingpit kahimut-an niya, magamabungahon sa tanang mga maayong buhat, ug magatubo sa kahibalo mahitungod sa Dios;

Nga malinig-onan kamong tanan. . . sumala sa iyang mahimayaong gahum, nga sa bug-os nga pagpailub ug pag-antus uban ang kalipay;

Nga nagapasalamat sa Amahan, nga mao. . . ang naghimo kanatong takus nga. . . umalambit sa panulondon sa mga balaan. . .

Nga mao ang nagluwas kanato gikan sa gahum sa kangitngit, ug nagbalhin kanato ngadto sa gingharian sa iyang hinigugmang Anak:

111 Nagapadulong na kita dinhi karon. Himatikdi.

Nga kaniya nakabaton kita sa atong pagtubos pinaagi sa iyang dugo, sa pagpasaylo sa atong mga sala:

Nga siya mao ang dagway sa Dios nga dili-makita, . . .

112 Nakuha n’yo ba kini? Ika-15 nga bersekulo, Mga Taga-Colosas 1:15.

. . . ang panganay sa tanang mga binuhat:

113 Amen! Sa unsa? “Ang panganay sa tanang mga binuhat.” Mahimo nga Manulonda kini, mahimo nga bisan unsa pa man kini; Siya mao ang panganay sa tanang mga binuhat.

Kay diha kaniya gibuhhat ang tanan—gibuhhat ang tanang mga butang, sa mga langit, o. . . sa yuta, mga butang nga makita. . . mga dili-makita, bisan ang mga trono, kun mga kaginoohan, . . . mga kapunoanan, . . . mga kagamhanan; ang tanang mga butang gipamuhhat pinaagi kaniya, ug alang kaniya:

114 [Nagbuga og hangin si Igsoong Branham, nga nagpakurog sa iyang mga ngabil—Ed.] Mahimo nga bisan unsa pa man kini;

wala na gayu'y lain pa nga persona! Himatikdi, “Ug sa . . . Ug busa siya . . .”

. . . siya mao ang una sa tanang butang, ug diha kaniya ang tanang mga butang nagapadayon.

¹¹⁵ Kini man ang Amahan, Anak, Espiritu Santo, bisan unsa pa man kini, “Siya mao ang una sa tanang butang.” “Una sa tanang mga butang sa Kalangitan, sa yuta; makita, dili-makita, o bisan unsang butang,” kining Anak sa Dios mao gayud ang una sa tanang mga butang. Husto ba kana? Dili ko igsapayan, kon mga trono man kini, mga pamunoan, bisan unsa pa kini; Langitnon man nga mga trono, mga gingharian, bisan unsa pa man kini diha sa halangdong supernatural nga mga gingharian dinha, sa mga Eternidad kon diin man kini; bisan unsa pa man kini, mga Manulonda man, mga dios, bisan unsa pa gayud kini, “Siya mao ang una sa tanang butang.” Amen! Dili ba ninyo Siya makita? “Siya mao ang una sa tanang butang; ug gibuhat pinaagi Kaniya. Siya . . .” Sa ika-17 nga bersekulo.

Ug siya mao ang una sa tanang butang, ug pinaagi kaniya ang tanang mga butang nagapadayon.

¹¹⁶ Wala’y bisan unsa man ang makapahigayon niini kondili Siya lamang. Ang Dios man kini nga Amahan, ang Dios man nga Espiritu Santo; mga Manolunda man kini, mga kapunoanan, mga kagahum, mga pagbulut-an man; bisan unsa man kini, ang tanang butang gipahigayon pinaagi Kaniya. “Ang tanang mga butang nagapadayon pinaagi Kaniya.” Siya!

Ug siya mao ang ulo sa lawas, ang iglesia: nga mao ang sinugdan—nga mao ang sinugdan, ang panganay nga gikan sa mga minatay (nga, bangoanon ang kung unsay Iyang gianhi aron tubson); aron nga sa tanang mga butang siya mahimong kinalabwan sa tanan.

¹¹⁷ “Nga mahimong kinalabwan sa tanan,” nahibalo ba mo kon unsay buot pasabot niini? Kini maoy, “labaw sa tanan.” Siya mao ang labaw sa tanang mga butang nga nabuhat sukad; sa matag Manulonda, sa matag binuhat, sa matag—sa matag butang nga ania dinhi. Siya mao ang labaw sa tanang butang. Unsa man Kini nga Binuhat? Si Kinsa man kini? Nga labaw gayud sa tanang mga butang! “Ug nahimo ang pakigdait . . .” Atong tan-awon, sa kadali lang. Kinalab- . . .

Kay nahamut-an sa Amahan nga diha kaniya magpuyo ang tanang kahupnganan;

¹¹⁸ “Ang bug-os nga kahupnganan sa tanang mga butang.” Ang bug-os nga kahupnganan sa Dios, ang bug-os nga kahupnganan sa mga Manulonda, ang bug-os nga kahupnganan sa panahon, ang bug-os nga kahupnganan sa Eternidad; ang tanang butang anaa diha Kaniya. Ingon niana kini nga Persona.

Ug, pinaagi kaniya ang pagpasig-uli sa tanang mga butang ngadto sa iyang kaugalingon, sa nahimo niya ang pakigdait pinaagi sa iyang krus; pinaagi kaniya, nagaingon ako, kon ang mga butang sa yuta, o ang mga butang sa langit.

119 Kana mao ang dakung Binuhat nga atong ginahisgotan, “Ang sinugdan sa pagbuhat sa Dios.”

120 Karon, karon kana, ang Iglesia, nga ang Iya gayud tibuok nga katuyoan mao ang Iglesia. Karon giunsa ba nato sa pagpakasulod sa niini nga Iglesia? “Pinaagi sa usa ka Espiritu kitang tanan gibautismohan ngadto sa usa ka Lawas,” ang Iglesia, ang Lawas ni Cristo. Dili gayud kini mapakyas.

121 Karon, ania ang kon unsay nagakahitabo. Karon bantayi kining, usa lang ka gamay nga paghulagway dinhi. [Ginapakita pag-usab ni Igsoong Branham ang iyang gi-drawing nga tulo ka mga lingin—Ed.]

122 Karon, kining tawong panggawas mao ang unod. Mao kana ang ginatan-aw nato; kung unsay makita nato. Ug aduna kini og lima ka mga agianan pasulod sa niana nga lawas. Ug ang bisan unsa man nga bata nga nagaeskwela og gramatika, sama kanako, nasayod gayud nga adunay lima ka mga sensya ang nagkontrolar sa lawas; igtatan-aw, igtitilaw, igbabati, igsisimhot, ug igdudongog. Kung wala kana, dili mo mahimong makontak ang lawas. Mao lang kana ang paagi nga aduna ka’y pagkontak ngadto sa lawas; igtatan-aw, igtitilaw, igbabati, igsisimhot, igdudongog; makita mo kini, matilawan kini, mabati kini . . . Karon, dinha ang dautan, ang diha sa gawas.

123 Karon, ang sulod niana mao ang usa ka espiritu, nga mao ikaw pagnahimugso ka na sa yuta ug gihuyoy na kaniya ang gininhawa sa kinabuhi. Kana nga espiritu maoy iya sa kalibutanon nga kinaiyahan tungod kay wala kana gihatag nga gikan sa Dios, apan kini (gihatag) gitugot sa Dios. Karon inyo ba kanang nasabtan? Kay, ang matag bata nga natawo dinhi sa kalibutan, “natawo sa sala, giumol diha sa kadautan; mianhi sa kalibutan nga nagapanulti’g bakak.” Husto ba kana? Busa, kana nga tawo, dinha sa sulod, usa ka makasasala, sa sugod pa lang. Karon, apan . . .

124 Karon, aduna kini og lima ka mga agianan pasulod. Ug kining lima ka mga agianan pasulod . . . Wala ko kahibalo kon ako bang mahinumduman ang mga niini karon mismo. Sa diha nga ang . . . Una, ang nahibaloan ko, mao ang panghunahuna, konsensiya, ug gugma, pagpili . . . Dili. Konsensiya, gugma, pagpangatarungan . . . Adunay lima ka mga agianan pasulod sa espiritu. Dili mo mahimong maghunahuna pinaagi sa imong lawas; kinahanglan nimong maghunahuna pinaagi sa imong espiritu. Dili mo mahimong magkaaduna og konsensiya diha sa imong lawas. Wala kini og salabutan man lang;

ang imong lawas walay ingon-niini, busa kinahanglan mong maghunahuna pinaagi sa imong espiritu. Gikinahanglan nimong mangatarungan. Dili mo mahimong mangatarungan pinaagi sa imong pisikal nga lawas, tungod kay ang pagpangatarungan dili man makakita, makatilaw, makasimhot o makadungog. Ang pagpangatarungan mao ang kung unsay mahimo mo diha sa imong hunahuna. Kung ikaw tulog man o anaa sa kawalay-panimuut, anaa lang dinha ang imong lawas nga mora og patay, apan sa gihapon mahimo pa sa imong espiritu nga mangatarungan. Aduna gayu'y lima ka mga sensya nga nagakontrolar sa nianang tawong ania-sa-sulod. Ug kana . . .

¹²⁵ Karon, diha sa katapusan nga tawo, nga mao ang kalag, aduna lamang og usa ka sensya nga nagakontrolar niana, ug kana mao ang gawasnon . . . gawasnong kinaugalingong pagbuot aron sa pagpili o pagsalikway.

¹²⁶ Ug karon ang hinungdan nga ang mga tawo sa karon nga adlaw . . . Karon, ayaw ninyo kini kalimti ha, ug inyong—makita ninyo kung unsa ang Balaan . . . kung unsa ang unang kapanghimatuoran sa Espiritu Santo. Kita n'yo?

¹²⁷ Karon, mahimo man sa mga tawo nga mabuhi sa niining espiritu, ug nagasayaw sila sa espiritu. Nagasinggit sila sa espiritu. Nagaadto sila sa iglesia sa espiritu, ug mahimong bug-os gayud nga maangkong nila ang tinuod nga Espiritu sa Dios nga maoy nagdihog niana nga espiritu, apan mangalaglag sa gihapon ug pagkayawan-on nila sa gihapon, bisan pa sa niana nga espiritu.

¹²⁸ Tungod kay, bantayi, mao kana'y hinungdan nga dili mo puedeng sultihan ang maong babaye, nga sayup gayud, ang pagsul-ob niya og mga shorts. Dili mo siya puedeng sultihan nga sayup gayud ang pagpapatol niya sa iyang buhok. “Bueno, unsa man ang kahilambigitan sa imong buhok diha niini?” Bueno, aduna kadto'y kahilambigitan alang kang Samson. Kita n'yo?

¹²⁹ “Ang kinsa man nga magadugang og usa ka pulong ngadto Niini, o magataktak og usa ka pulong gikan Niini.” Kinahanglan aduna ka gayud og usa ka pinakabasihanan sa kon asa man.

¹³⁰ Karon, pananglitan, kung ako usa—usa—usa ka lalaking Baptist, ug miduol ka ug gisultihan ako nga kinahanglan kong—kinahanglan kong mabautismohan sa Ngalan ni Jesus Cristo; anaa man kini sa Biblia. Bueno, mahibaloan mo na lang, moingon ako, “Pangutan-on ko ang akong pastor.”

¹³¹ Ug moadto ako sa pastor; moingon siya, “Oh, butang kana nga sa kaniadto pa, kita n'yo. Oo, kita n'yo, kita nga mga Baptist, mao kini ang atong ginatooan; nagatoo kita nga kinahanglan natong maituslob sa mga titulo nga ‘Amahan, Anak, Espiritu Santo.’ Sa ingon nianang paagi nga gibuhat kini sa tanang iglesia. Sukad kaniadtong gitukod kini ni John Smith, sa ingon

nianang paagi gayud nga ginabuhat kini.” Bueno, mao kana ang imong pinakabasihian. “Bisan unsa pa’y isulti nianang tawhana!”

¹³² Unsa kaha kung usa ikaw ka Methodist, ug pagwisik-wisik ang imong sistema, ug gikasultihan ka na nga kinahanglan kang maituslob? Inyo bang makita kung unsa ang buot kong ipasabot? Mobalik ka ngadto sa Methodist nga pastor, ug dayon magsulat siya ug pangutan-on ang obispo, kung si *ingon-ani-ug-ingon-ana* nagsulti ba og *ingon-ani-ug-ingon-ana* mahitungod sa *ingon-niini*. “Apan kita, ang iglesia nga Methodist, natukod kita tulo o upat na ka gatus ka tuig ang milabay, didto sa England, ni John Wesley, ug ni Whitefield, ug ang tanang uban pa kanila didto, ug ni Asbury. Gipasikad nato kini nga dokumento, nga ginusunod si John Wesley, nga gikinahanglan kita nga mawisik-wisikan, tungod kay usa lamang kini ka panggawas nga emo-. . . porma. Ug ang tan-aw nato nga ang pagwisik-wisik ingon kini ka maayo sama sa uban pa nga paagi.” Kung usa ikaw ka tinuod. . . Kung ang iglesia nga Methodist mao ang imong pinakabasihanan, kutob ka lang niana.

¹³³ Kung usa ikaw ka Katoliko. . . Ug sultihan ta ka, nga wala kini diha sa Biblia nga dili puedeng mokaon og karne sa matag Biyernes, ug tanan niining mga butang nga sama niini, ug “ang Balaang Eyukarista dili nga usa ka ostiyas, tungod kay Espiritu kini,” ug uban pa. Ug moadto ka sa imong pari, moingon ang maong pari, “Ania kini, nga nahisulat mismo sa atong dokumento.” Ug kung ang iglesia mao ang imong pinakabasihanan, dili mo igsapayan bisan unsa pa ang ginasulti ni kinsa man. Mao kana ang imong pinakabasihanan.

¹³⁴ Oh Dios, tabangi kini nga motuhop gayud sa mga hunahuna! Para kanako, sayup gayud ang maong tibukok butang. Ang Pulong sa Dios mao gayud ang pinakabasihanan. Bisan unsa pa man ang ginasulti niana nga Pulong, nan husto kana.

¹³⁵ Karon, ang bugtong dalan pasaka ngadto niini nga mga dapit, nga mamahimo mong maania sa niining gamay’ng ania-sa-sulod nga tawo; ug kinahanglan nga gikatagana ka nang daan. Tungod kay kauban ka na sa Dios kaniadto pa, kabahin ka sa Dios.

¹³⁶ Anaa na ako sa akong amahan kaniadto. Anaa na usab ako sa akong lolo kaniadto, ug sa lolo sa akong lolo. Tungod sa binhi, anaa na ako niana.

¹³⁷ Ug anaa na ako kang Cristo kaniadto pa. Anaa na kamo kang Cristo sa wala pa ang pagkatukod sa kalibutan. Mianhi Siya aron sa pagtubos sa Panag-iya Niya, ang Panag-iya Niya nga anaa na Kaniya kaniadto pa. Alleluyah! Ang Iyang mga anak nga anaa na Kaniya kaniadto pa!

¹³⁸ Wala Siya mianhi aron—aron luwason ang mga anak sa yawa. Dili gayud sila makaila Niini. Ug mga maalamon kaayo sila sa

mga pamaagi sa ilang intelektuwal nga kahibalo, nga dili ka man lang arang ikatandi kanila. Dili mo sila malabwan sa pagpanulti. Apan, pinaagi sa pagtoo imo Kining makita.

¹³⁹ Karon, wala nagkinahanglan ang siyensiya og bisan unsa man nga pagtoo. Ginapamatud-an sa siyensiya kung unsa ang ilang ginasulti. Wala kini nagkinahanglan og bisan unsa man nga pagtoo.

¹⁴⁰ Moingon kanimo ang Katoliko nga pari, “Tan-awa kung unsa na kadugay nga milambo ang iglesia nga Katoliko. Tan-awa kung unsa na kini kadugay nga nagpabilin sa ilalum sa mga pagpanglutos sa paganismo.”

Moingon ang iglesiang Methodist, “Tan-awa dinhi kung unsa na kadugay . . .”

¹⁴¹ Nakakita ako og usa ka iglesia . . . kung paghisgotan ang hipokritong karatula; sa pag-agi ko sa dalan didto kagahapon, nga akong nakita. Miingon, “Ang iglesia ni Cristo, gitukod kaniadtong A.D. 33.” Wala pa gani og usa ka gatus ka tuig kini, kita n’yo, ang maong denominasyon. Oh, grabe! “Doktrina sa mga apostoles”? Halos wala gani bisan og unsa. Sila mao ang mga Saduceo sa niining panahon; wala ang Espiritu, wala . . . Ug dili mo sila masultihan; dili mo sila maestoryahan; dili ka makapangatarungan kanila.

¹⁴² Tungod kay, ginalagpasan nato ang pangatarungan. “Ayaw pagsalig sa imong kaugalingong salabutan.” Ang pagtoo wala man lang nagapangatarungan. Nagatoo Niini ang Pagtoo.

¹⁴³ Nagaingon sila, “Karon, tan-awa dinhi, nagatoo ka ba nga kinahanglan pa natong buhaton kining mga butang nga sa kaniadto pa? Binuang! Kana’y . . .”

¹⁴⁴ Apan mao man ang giingon sa Biblia. Dili ko makasaysay kung giunsa nga nagakahitabo kini, apan nagakahitabo kini. Maoy giingon sa Dios. Busa dili na kamo kinahanglan . . . Dili ako makasulti og unsa pa man kaninyo mahitungod niini. Ang Pagtoo dili nagasaysay Niini. Nahibalo ba kamo Niana? Ginatoohan lamang Kini sa Pagtoo.

¹⁴⁵ Miingon si Jesus kang Nicodemo, nga taga San- . . . konsehong ekumenikal sa Iyang panahon; miadto Kaniya sa kagabhion, miingon, “Magtutudlo, kami nahibalo nga Ikaw usa ka Magtutudlo nga gikan sa Dios, kay walay tawo nga makahimo sa mga butang nga Imong ginahimo, gawas nga ang Dios uban Kaniya.”

¹⁴⁶ Miingon Siya, “Sa pagkatinuod, magaingon Ako kanimo, ‘Gawas kung ang tawo matawo pag-usab, dili gayud siya makakita sa Ginghamian sa Dios.’”

¹⁴⁷ Miingon, “Ako, nga usa na ka tigulang, mosulod na usab sa tagoangkan sa akong inahan, aron igaanak?”

148 Miingon Siya, “Karon unsaon Ko man sa pagsulti kanimo og Langitnong mga butang, nga wala mo man gani ginatoohan ang yutan-ong mga butang?” Kita n’yo?

149 Dayon miingon Siya, usa niana ka adlaw, “Gawas kon kamo mokaon sa unod sa Anak sa Tawo, moinom sa Iyang Dugo, wala kamo’y Kinabuhi diha kaninyo.” Wala na Niya kadto gisaysay.

150 Kadto nga mga apostoles ug sila sa kaniadto nga panahon, nga gikatagana na ngadto sa Kinabuhi; nasayod Siya niadto. Miingon, “Ang tanan nga gikahatag Kanako sa Amahan magaduol. Ang bugtong butang nga kinahanglan mong pagabuhaton mao lamang ang pagpaila sa Akong Tingog; makaila sila niini, kay ang Akong mga karnero nakaila sa Akong Tingog.” Ug ang tingog maoy usa ka pulong nga nadayag. [Blangko nga bahin sa teyp—Ed.] “Ginatoohan nila Kini, bisan pa man. Dili na nila kinahanglang pamatud-an sa siyentipikanhong pamaagi ang bisan unsang butang, o mangutana sa bisan kinsa nga Saduceo o Fariseo, o sa unsa pa man nga butang, mahitungod niini. Kay Ako kining gisulti, ginatoohan nila kini, kay ang Akong mga karnero nagapatalinghug sa Akong Tingog.”

151 Ug *Kini* mao ang Tingog sa Dios sa pormang letra, tungod kay mao *Kini* ang kinatibuk-ang kapadayagan ni Jesus Cristo, ang Daan ug Bag-ong Tugon nga giusa. Amen. Tan-awa.

152 Ngano man? Moingon kamo, “Buutan man kini nga mga tawo. Unsa ma’y nakapaingon-niana kanila. . .” Tungod kay, usa ka butang, ang ilang haliging-hikutanan anaa man sa usa ka iglesia. Ug dinhi. . . Mahinumduman ba ninyo niadtong miaging Dominggo, usa na ka semana ang milabay; pila ba ang ania dinhi ug nadungog ang wali bahin sa *Ang Mga Dinihogan Sa Katapusang Mga Adlaw?* Kamong tanan siguro. Kita n’yo, mga dinihogan sila. Dinihogan ang ilang mga espiritu, sa *niining* ikaduhang pang-tawhanong bahin.

153 Karon, nagaingon kadtong unang babaye. . . Dili, dili niya igsapayan kung unsa ma’y ginasulti sa iglesia, kung unsa ma’y giingon ni kinsa pa man. Utokan siya. Aduna siya og pang-kolehiyo nga edukasyon. Mahimo niya kadtong ilimod sa iyang bana, ug naghunahuna nga maantigo gayud siya sa pagbuhat niadto.

154 Kining usa ka babaye usab “hubo, buta, ug wala mahibalo niini.” Oh, makaluluoy kaayo, apan mao kana ang hulagway nga ginahulagway sa Biblia kanato. Karon, nagasimba siya. Kana nga babaye, mahimong mas maayong babaye tingali, kana nga babaye mahimong. . . Nagakinabuhi siya og maayo, mahinlo nga pagkinabuhi; wala kita’y bisan unsa man nga batok niana. Ang Dios mao ang mamahimong Maghuhukom niini. Wala ako nasayod; dili ako ang Maghuhukom.

155 Ako lamang ang...manubag sa kung unsa ang Iyang ginapakita kanako. Mao kana ang gisulti sa mga apostoles. "Among ginasulti ang kung unsay nahibaloan namo, kung unsay nadungog namo, kung unsay nakita namo." Mao lamang kana akong tulubagon. Mao lamang kana ang inyong tulubagon.

156 Apan karon, nakita n'yo, kung tan-awon n'yo kanang mao ra nga babaye...Diin man siya mipaingon? Kita n'yo? Sige siya balhin-balhin. Nakadungog gayud siya, sa walay pagduhaduha; iyang gipaandar ang radyo, sa makadaghang higayon. Nagpakigsulti ang Tingog sa Dios, sa makadaghang higayon. Bueno, karon, kita n'yo, misimba siya sa niining kulto dinhi, nga usa ka sekta. Mga sekta lang ang tanan nga mga kaiglesiahan. Ang tanan gayud, husto kana, sila'y mga kapunongan lamang kon diin nanagkauban ang mga tawo isip pagpamiyembro. Ug ania siya nga nagapamiyembro dinhi; bueno, bagay ra gyud kana kaniya. Karon kung moadto ka ug sultihan siya kung unsa ang angay niyang buhaton, dili siya maminaw nimo. Ipakita mo pa kini kaniya diha sa Biblia; dili gayud siya maminaw Niini.

157 Karon, minahal kong igsoong lalaki, igsoong babaye, usa o duha na lamang ka komentaryo sa dili pa ang pagtapos. Kinse minutos na lang hangtud, oras na sa pagtapos; kinse minutos.

158 Karon tan-awa, aduna ko'y gustong ipangutana kaninyo. Nganong dili man kana makita niadtong babaye? Nganong dili man niya makita? Kung hisgotan ang pagpanapaw sa pisikal, batok sa iyang bana, dili siya sad-an; walay bisan unsa man nga kinahanglan niyang isugid. Ingon niana siya kahinlo sama sa kaniadtong adlaw nga natawo siya; walay lalaki nga nakahikap kaniya.

159 Nagahisgot ako karon sa pagkasusama, sa babaye, sa iglesia. Ingon niana siya kahinlo sama sa kaniadtong natawo siya. Bueno, eksaktong ingon niana gayud ang iglesia, sama kaniadtong sa iyang pagkahimugso, apan siya "natawo man sa sala, giumol diha sa kadautan, mianhi..." Nasabtan ba ninyo ang buut kong ipasabot?

160 Karon sultihan mo siya nga sayup alang kaniya nga putlan ang iyang buhok; maoy giingon sa Biblia. Sayup alang kaniya nga magsul-ob nianang mga short; maoy giingon sa Biblia. Moingon siya, "Binuang." Ngano man? Ang iyang pinakabasihanan wala man *dinhi*, sa nianang ikatulo nga tawo, sa kalag nga gipili nang daan ug gikan sa Dios. Apan ang iyang pinakabasihanan anaa diha sa usa ka organisasyon *dinhi*, nga giorganisa sa usa ka tawo nga gawas Niini. Kita n'yo?

161 Apan kung ang Pulong sa Dios anaa diha sa niana nga kalag, moingon kini, "Amen! Nakita ko kini." Nagalinya kini diha Niini. Karon tan-aw dinhi. Busa, ang tawo nga natawo sa Espiritu sa Dios...

¹⁶² Kita n'yo, *ania* ang panggawas nga unod. Ug nagasulti ako diha sa nagkasagol nga tumatambong, magpakigsulti ingon nga inyong—ingon nga inyong pastor, ingon nga inyong igsoon. *Ania* ang unod, mahuyang kini, sigurado kini nga . . . Adunay usa ka batan-ong gining nga nagalakaw diha sa dalan; usa pud ka batan-ong lalaki nga anaa pa lamang sa iyang kabatan-on, nga siya nag-edad og dise-siete, dise-otso, baynte anyos ang panuigon, baynte-singko, traynta, nagalakaw usab didto . . . Ug pag-agi sa niining batan-ong babaye, nga ginakiay-kiay ang matag porma, sa iyang lawas, nagalakaw nga sul-ob ang usa ka pares sa sapatos nga habog og tikod; huot kaayo ang lawas sa atubang ug likod; ug ang bistida ingon niana ra ka taas nga ibabaw na sa iyang tuhod, o halos nagsul-ob ra og shorts. Nahibalo ba mo nga ang Biblia nag-ingon na nga magapanglikok siya nga sama niana? Kabalo mo, ang Biblia miingon na nga magapanglihok siya nga sama gayud niana, nga mamahimo siyang pagkahilas na kaayo.

¹⁶³ Nabasa ba ninyo kini dinhi, sa *Reader's Digest* karong bulana, nga, “Ang mga kalalaken-an ug kababayen-an niining panahona, mga batan-on pang kababayen-an, gikan sa baynte o baynte-singko anyos ang panuigon, naga-menopos na,” nga maggaagi kamo sa kausaban sa kinabuhi diha sa tunga-tunga nga panuigon sa kinabuhi, sumala sa siyensiya, mga baynte ug baynte-singko pa lang. Anaa kini sa mga traynta o trayntay-singko kaniadto, sa panahon nako. Sa panahon sa akong inahan, ang usa ka babaye dili pa modangat og menopos hangtud nga siya anaa na sa kuwarenta o kuwarentay-singko.

¹⁶⁴ Unsa man kini? Tungod kini sa siyensiya, ug sa pagkaon, sa mga pagpang-hybrid, nga maoy nagdaut sa tibuok lawas sa tawo hangtud nga nahimo na kitang usa ka pundok sa—sa—sa nagtipun-og nga kadunot. Bueno, kung daut na ang pisikal nga lawas, dili ba usab ang selula sa utok nga anaa diha nianang pisikal nga lawas?

¹⁶⁵ Karon bantayi ang Espiritu, nga nagasunod niini. Moabot ang panahon, sa Ngalan sa Ginoo, nga bug-os gayud nga mabuang ang mga tawo. Maoy ginaingon sa Biblia. Managpaninggit sila ug managtiyabaw; makalilisang kaayo nga mga butang ang anaa sa imahinasyon sa ilang hunahuna. Ang mga radyo ug ingon-anang mga butang, ang atong mga programa sa telebisyon, maoy hinungdan niini. Adunay mga butang nga sama sa mga hulmigas ang manggula sa ibabaw sa yuta, nga mahimong ingon ka habog sa katorse ka mga kahoy; adunay usa—usa—usa ka langgam ang molupad sa tibuok kalibutan, nga adunay mga pako nga upat o lima ka milyas ang kalapdon; ug makit-an kini sa mga tawo, managpaninggit sila ug managtiyabaw, ug manghilak alang sa kalooy. Apan mao kini ang mga Hampak. Hulata lang ninyo pag-iwali ko na ang pagbukas sa nianang mga Hampak.

166 Tan-awa kung unsay gihimo ni Moises sa ilalum sa pisikal nga lawas, dili sa Espiritu, sa dihang miingon Siya kaniadto, “Moises . . .” Miingon ang Dios ngadto kang Moises, “Umadto ka didto,” sa Iyang propeta, “pagpudyot og usa ka hakop nga abog, iitsa kini sa hangin ug moingon, ‘MAO KINI ANG GINAINGON SA GINOO, magapanungha ang mga pulgas sa ibabaw sa yuta.’” Wala ma’y mga pulgas kaniadto. Mahibaloan mo na lang, misugod na sila nga makakita og butang nga nagakamang diha sa kasagbotan. Ilang gitan-aw, og adunay uban pa. Ug pagkataud-taud, ingon na kabaga ang kadaghan nila nga dili ka na mahimong makahinay-hinay og lakaw agi kanila.

167 Diin ba gikan ang mga niini? Ang Dios mao ang Magbubuhat. Mahimo Niya kung unsa ang buot Niyang pagabuhaton. Makagagahum Siya. Makahimo Siya sa pagbuhat og usa ka—usa ka langgam nga moabot—ibukhad ang mga pako niini gikan sa usa ka bahin sa kalibutan hangtud sa pikas bahin.

168 Miingon siya, “Magkaaduna og mga langaw, nga motabon sa ibabaw sa tibuok nga yuta.” Wala gayu’y ni usa ka langaw sa yuta kaniadto. Makita mo na lang, ang usa ka tigulang nga lagong nga misugod na sa paglupad diha sa palibot. Ang unang butang, aduna na’y walo o napulo, dose. Mahibaloan mo na lang, dili ka na makaagi diha kanila. Ang Dios, ang Magbubuhat, nagatuman gayud sa Iyang Pulong.

169 Ug gituy-od niya ang iyang sungkod, sumala sa sugo sa Dios, ug miingon, “Magkaaduna og mga baki ug magatabon sa yuta.” Ug nanungha ang mga baki hangtud nga nagkatipun-og ang mga niini, nagkatapok, ug nanimaho na bisan asa, tingali mga kuwarenta o singkwenta ka piye ang kahabugon, sa mga baki. Atua sila bisan sa pingganan ni—ni Faraon. Atua sila sa . . . inig pilo nila sa habol, ug didto may lima ka gatus nga mga baki ilalum sa maong habol, ilalum sa higdaanan, sa pagkaon. Bisana man sila moadto, aduna gayu’y mga baki, mga baki, mga baki. Asa man gikan kadto? Ang Dios, ang Magbubuhat, makagagahum gayud. Kung unsa ma’y Iyang ginasulti, buhaton gayud Niya!

170 Ug Siya miingon nga adunay moabot og makalilisang nga mga talan-awon ibabaw sa yuta. “Mga dulon nga adunay buhok nga sama sa mga babaye,” tag-as nga buhok, aron nga paantuson kadtong mga kababayan-ang nga nagapaputol sa ilang mga buhok. “Mga ngipon nga sama sa leon; may mga ikot sa ilang mga ikog, nga sama sa mga tanga; pagasakiton nila ang mga tawo, sulod sa pila ka bulan.” Hulati lang ninyo hangtud nga modangat kita bahin sa pag-abli nianang mga Hampak ug mga Selyo, ug nianang Pito ka mga Dalugdog, tan-awa ninyo kung unsay magakahitabo. Oh, igsoon, mas maayo pa nga moadto ka na sa Gosen samtang aduna pa’y panahon nga moadto sa Gosen. Ayaw hatagi og bisan unsang pagtagad ang kining panggawas.

¹⁷¹ Tan-awa dinhi. Ania kining batan-on nga babaye nga ginapakiay-kiay ang iyang kaugalingon diha sa dalan; ania usab ang usa ka batan-ong lalaki, ug nakita kini sa iyang mga mata. Usa siya ka miyembro sa iglesia. Usa siya ka Pentecostal. Bisan unsa pa man siya. Apan ang unang butang kabalo ba mo, wala ma'y poste nga hawiranan *dinha*. Moingon ang maong babaye, "Hello." Kulot ang iyang buhok, ug medyo guwapohon, tul-id og abaga nga batan-ong lalaki; tingali naningkamot nga magkinabuhi nga tarung. Ang maong babaye misugod og lakaw padulong kaniya, usa pa na man ka magwawali. Mahibaloan mo na lang. . .

¹⁷² Unsa man kini? Kining ania sa gawas *dinhi*, ang unod nga nagapangibog; ug ang espiritu nga ania *dinhi*, bisan og dinihogan, nagaingon, "Ayaw kana buhata, ayaw kana buhata." Apan unsa ma'y buhaton niini? Padayon kining moduol didto, mogunit, dayon mao na. Mahibaloan mo na lang, naninguha na siyang mapakuyog sa gawas ang maong babaye. Siya'y sad-an gayud sa pagpanapaw, nahikap man niya ang babaye o wala.

¹⁷³ Apan, ang usa ka tinuod, natawo na pag-usab nga anak sa Dios! Amen! Dili ka gayud makahimo niini. Imposibli kaayo kini alang sa usa—usa ka malagsik nga lalaki nga moduol atubangan sa usa ka babaye nga sama niana, nga walay unsa man nga nagakahitabo. Apan kon adunay Usa ka Butang *dinha* sa sulod; kanang gamay'ng Butang nga natawo na pag-usab *dinhi*!

¹⁷⁴ Bisan pa tingali og naginginggit kadto nga lalaki, nagsulti sa laing mga dila, milukso, misayaw, ug tanang uban pa, dinihogan sa Espiritu; nabuhat na ang tanang mga ilhanan ug katingalahan nga gisulti sa Dios *dinha*, pinaagi sa Iyang Espiritu! Si Jesus miingon, "Daghan ang magaduol Kanako nianang adlaw, moingon, 'Ginoo, dili ba naghimo man ako'g mga propesiya tungod sa Imong Ngalan? Dili ba nagpagula man ako og mga yawa tungod sa Imong Ngalan? Dili ba. . .'" Miingon Siya, "'Pahalayo kamo Kanako, kamo nga mamumuhat og kadautan.'" Unsa ba ang kadautan? Usa ka butang nga imong nahibaloan nga angay mong buhaton, ug wala kini ginabuhat. "'Pahalayo kamo Kanako, kamo nga mamumuhat og kadautan; wala gani Ako nakaila kaninyo.'"

¹⁷⁵ Apan *dinha* sa sulod nianang lalaki, kung anaa kanang gamay'ng haliging-hiktanan *dinha*, kanang Binhi sa Dios nga gipili nang daan sa wala pa ang pagkatukod sa kalibutan; dili ko igsapayan kon unsa man ang magakahitabo, pagagunitan siya niini. Anaa kini *dinha* aron magpabilin.

¹⁷⁶ Mao kana'y hinungdan nga kana nga babaye magasul-ob nianang mga shorts. Pagaisipon siya ingon nga usa ka bigaon, sama ra usab sa babaye nga anaa mismo sa akto. Kita n'yo? Wala siya mahibalo nga kana nga espiritu. . . Unsaon man niya pagkahibalo? Sa iyang pinakabasihanan.

¹⁷⁷ Unsa ba ang pinakabasihanan? Kini mao ang kinatapusan nga pulong. Ang pinakabasihanan mao ang amen. Kini mao ang kinatapusan sa tanan nga panaglantuhi, ang imong pinakabasihanan.

¹⁷⁸ Ug kung ang iglesia ninyo, usa ka iglesiang Pentecostal, nga nagasulti kaninyo nga, “Ang pagpataas og buhok ug ingon-anang butang panatisismo lamang. Mora ka og adunay reserba nga ligid, sa luyo sa imong ulo,” ug uban pa, mga ingon-anang butang, giyawaan kanang tawhana.

¹⁷⁹ Kay, miingon ang Pulong sa Dios, “Makauulaw kini alang sa usa ka babaye nga putlan ang iyang buhok. Ginapakaulawan niya ang iyang ulo.” Kung ginapakaulawan niya ang iyang bana, ug ang iyang bana mao ang Iglesia, ug ang Iglesia mao si Cristo, usa siya ka makauulaw nga relihiyosong bigaon; hubo ug wala mahibalo niini. Hubo! Dili ba nga nagaingon ang Biblia, “Ang igpapandong sa usa ka babaye mao ang iyang buhok”? Dili ba gihatag man kaniya ang buhok ingon nga usa ka igpapandong?

¹⁸⁰ Sa umalabot nga adlaw, didto sa Korte sa Paghukom! Gipaningkamotan ko na nga ipatumar ang maong Tambal, ug gihawirin pa gyud Kini sa akong mga kamot, ug inyo Kining gilua mismo nga nagagawas diha sa tunga sa inyong mga tudlo. Pagahukman sila sa Dios sa umalabot nga adlaw. Mao kana ang MAO KINI ANG GINAINGON SA GINOO. Dili kini usa ka bugkos sa pagbinuang-binuang, o daan nang nabuang nga tawo nga nadala lang sa iyang mga pagbati. Dili kini ingon-niana. Tungod, kini mao ang Pulong sa Ginoo.

¹⁸¹ Ug ang usa ka tinuod, lunsay nga Cristohanon magasunod gayud nianang tawong ania-sa-sulod, nianang Espiritu nga anaa na didto sa sinugdan pa kaniadto, nga mao ang Pulong.

¹⁸² Ingon nga Siya mao ang bug-os nga kahupnganan ninyong tanan, atua na kamo Kaniya didto sa Kalbaryo kaniadto. Daan na Niyang nahibaloan nga maania kamo dinhi. Iya lamang gipahibalo kung unsa ang magakahitabo. Ug atua na kamo Kaniya kaniadto; namatay kamo uban Kaniya. Namatay kamo sa inyong garbo, namatay kamo sa inyong mga urog, namatay kamo sa kalibutan. Sa dihang Siya . . . Namatay kamo uban Kaniya didto sa Kalbaryo, ug nabanhaw kamo uban Kaniya sa dihang nabanhaw Siya sa ikatulo nga adlaw. Ug tungod kay gidawat man ninyo kini, kamo karon napahimutang na sa Langitnong mga dapit diha kang Cristo Jesus. Alleluyah!

¹⁸³ Tan-awa. Kini mao kanang tawo nga ania-sa-sulod. Kanang anaa sa sulod nga magapunto sa Pulong, magapabilin sa Pulong, bisan unsa pa man. Dili ninyo kini mapugngan. Nakat-onan ko kana, pipila na ka tuig ang milabay.

¹⁸⁴ Nagahigda ang akong gamay'ng bata dinhi kaniadto, nga naghimalatyon na. Nagahigda usab ang akong asawa dinhi sa usa ka . . .sa-sa morge, nga gi-embalsamar na ug naghigda.

Ila akong gitawgan didto, ug naghimalatyon na si Sharon. Mao gayud kadto ang pinakalisud nga pagsulay nga akong nahinagbo sa akong kinabuhi sukad. Mga baynte-singko anyos ang panuigon ko kaniadto. Miadto ako didto, ug naghigda si Billy Paul nga nag-ungaw na sa kamatayon.

¹⁸⁵ Miduol si Doktor Sam, miingon, “Bill, sa hunahuna ko dili na nato mahimong masalbar pa si Billy. Ug ako . . .” Miingon siya, “Grabe na kaayo ang iyang kahintang.” Miingon, “Bill, naguol kaayo ko para nimo.” Iya akong gigakos.

Ingon ko, “Dok, wala na ako’y kusog.”

¹⁸⁶ Mga duha ka oras, gitawgan ko siya, ang akong anak, nga si Sharon, gadagan kong giadtoan siya didto, siya . . . nakita siya nga gina-atake; wala gayud kadto miundang. Nagbutang sila og dagom sa dugukan; ila kadtong gitusok, nahibaloan ang sintomas, nga tubercular meningitis. Kadto lang.

¹⁸⁷ Miadto ako padulong sa ospital; gihunong ang akong daan na nga truck didto, ug migawas ug misugod sa paglakaw ngadto sa maong lawak. Atua miabot si Sam didto sa pasilyo, nga naggunit sa iyang kalo, naghilak, iya akong gigakos, nag-ingon, “Duol ngari, Bill.”

Ingon ko, “Unsay nahitabo?”

Miingon, “Dili nimo siya mahimong makita.” Ingon pa, “Naghimalatyon na siya, Bill.”

Ug miingon ko, “Dili, Sam, dili ang akong anak.”

¹⁸⁸ Miingon, “Oo.” Miingon, “Ayaw na paghangyo alang kaniya, Bill. Mabuhi man ugaling siya,” miingon, “magaantus siya.” Ingon pa, “Kanunay na siya nga magabaku, ug magaantus gayud siya sa tibuok niyang kinabuhi.” Miingon, “Aduna siya’y meningitis.” Miingon, “Ayaw na pagduol kaniya; imong—patyon mo lang si Billy kon imo kanang buhaton.”

Miingon ko, “Sam, kinahanglan nakong makita siya.”

¹⁸⁹ Miingon, “Dili nimo puedeng buhaton kana, Bill. Ako—gidid-an ko ikaw. Karon, nasayod ka sa kung unsa nga naghunahuna gayud ako para nimo, ug higala ko ikaw ug tanan na,” ingon pa, “sa kung unsa nga naghunahuna gayud ako para nimo,” miingon, “ug sa kung unsa nga nagatoo gayud ako kanimo, Bill,” miingon siya, “apan ayaw—ayaw na pagduol nianang bata.” Miingon, “Kung imo kanang buhaton, . . . Aduna siya’y meningitis.” Kita n’yo? Miingon, “Mamatay na siya sulod sa pipila ka minutos, ug,” miingon, “mahimo kang . . . ilubong na nato siya.” Miingon, “Bill, naguol gayud kaayo ko para nimo.”

¹⁹⁰ Ug nagtawag siya, nagsulti, nagtawag og usa ka nars, aron magkuha og usa ka matang sa tambal para kanako. Miingon, “Wala ako mahibalo kung giunsa nga nakabarug pa kanang tawhana.”

¹⁹¹ Nagtindog ako didto sa makadiyut. Iyang gidala sa sulod ang maong tambal. Milingkod ako, sa pasilyo. Miingon siya, “Lingkod ka.” Ug gidala kadto sa nars, miingon, “Inoma kini, Igsoong Branham.”

¹⁹² Miingon ako, “Salamat. Ibutang lang kana dinha sa makadiyut.” Sa dihang mihawa na siya nga ingon-niadto, ako kadtong giyabo sa usa ka luwaan; gibutang pag-usab ang maong baso.

¹⁹³ Naglingkod ko didto. Nakahunahuna ako, “Oh Dios, unsa ba’y akong nabuhat? Buutan Ikaw nga Dios. Nganong gitugot Mo man nga mamatay siya, niadtong miaging adlaw, nga gigunitan ko pa ang iyang duha ka gagmay’ng mga bukton nga ingon-niana?” Nagapakiluoy Kaniya alang sa akong anak. “Nganong gitugot Mo man nga motaliwan siya? Atua si Billy nga nagahigda didto, nga naghimalatyon na; ug ania siya, nga naghimalatyon usab. Unsa ba’y akong nabuhat? Sultihi ako! Bueno, mas maayo pa nga mouban na lang ko kanila.”

¹⁹⁴ Gi-ablihan ko ang pultahan, ug walay nars nga atua didto. Mikanaug ko sa silong. Kadto maoy sa wala pa gi-ayo ang maong ospital. Ang mga salipud, wala pa’y mga salipud sa mga bintana kaniadto, halos, ug adunay mga langaw sa iyang gamay’ng mga mata. Adunay usa kabuok nga moskitero, ang among tawag niini, alamblera nga gibutang ibabaw sa iyang nawong. Akong gibugaw ang mga langaw; nga mitugdon didto. Ang gamay niyang mga mata, nag-antus gayud siya og ayo hangtud nga nabanlag ang mga niini.

¹⁹⁵ Dayon miduol si Satanas sa akong kiliran didto, ug miingon, “Misulti ka ba nga usa Siya ka buutan nga Dios?”

Ingon ko, “Oo, nagsulti ako niana.”

¹⁹⁶ “Misulti ka ba nga usa Siya ka Mananambal? Bueno, nganong namatay man ang imong amahan diha sa imong mga bukton didto, ug nagahangyo ikaw, siya nga usa ka makasasala, nagahangyo alang sa iyang kinabuhi? Nganong namatay man ang imong igsoon sa mga bukton sa usa nimo ka igsoon, didto, ug nagatindog ka diha sa pulpito nga nagawali, pipila na ka semana ang milabay?” Miingon, “Kung ingon-ana nganong wala man Siya mitubag kanimo? Miingon man kaha ka nga gihigugma ka Niya ug giluwes ka.”

¹⁹⁷ Dili niya mahimong isulti kanako nga walay Dios, tungod kay nakakita na ako Kaniya. Apan ginaingon niya nga wala kono nagkahingawa ang Dios alang kanako.

¹⁹⁸ Miingon, “Atua na gihaya ang imong asawa didto. Maatua usab ang imong mga anak didto sa dili madugay. Gilubong na ang imong amahan. Gilubong na ang imong igsoon. Ug ang imong asawa igalubong na, ugma. Ug ania ang usa pa nimo ka anak, nga naghimalatyon na. Siya’y usa ka buutan nga Dios?”

Huh? Siya’y usa ka Mananambal?” Miingon, “Ginailad mo lang ang imong kaugalingon!”

¹⁹⁹ Unsa ma’y gibuhat niini? Gikan sa . . . nagapamuhat kini gikan sa panggawas, karon, ngadto sa niining unang tawo.

²⁰⁰ Miingon, “Karon tan-awa. Abi nimo, sa dihang ikaw kaniadto pipila na ka tuig ang milabay, mga duha o tulo na ka tuig ang milabay, sa wala mo pa gidawat Kini, hataas ang pagtan-aw sa mga tawo kanimo. Nagkinabuhi ka og usa ka matarung, mahinlo nga pagkinabuhi. Bisan kinsa nga babaye sa siyudad, nga gustong mogawas, mouban gayud sila nimo, tungod kay mabati nila nga hinlo sila ug disente sila.” Mahimo kong motindog sa atubangan sa bisan kinsa man kanila. Wala gayud ako nagpakaulaw ni usa, wala gayu’y gisulti nga bisan unsa. Bisan pa og magpakaaron-ingnon nga listo kono siya, ako gihapon siyang ihatod pauli. “Ug nauyonan gayud ka sa mga tawo kaniadto. Apan naunsa ka naman karon? Usa na ka relihiyosong panatiko.”

²⁰¹ “Husto kana. Ingon-ana ako kaniadto.” Makita ba ninyo kining mga butang dungan nga nagasugod sa pagpanglihok? Kining anaa sa gawas, nga nagapangatarungan diha sa espiritu, dungan nga ginapalihok kining mga butanga. “Husto kana, Satanas.”

“Ug miingon ka nga Siya’y usa ka Mananambal?”

“Oo. Hum. Oo.”

²⁰² “Ug nagapakiluoy ka ug nagahilak, ug ginasulti kanimo sa mga tawo nga dili ingon niana kana, nga napahilayo ka na gayud. Gipahawa ka na sa kaugalingon mong iglesia, tungod Niini. Ang imo mismong iglesia nga Baptist didto, ang nagpagawas kanimo sa pultahan, tungod sa mao ra usab nga hinungdan.”

“Oo.”

²⁰³ “Gilubong na ang imong amahan. Gilubong na ang imong igsoon. Nagahigda ang imong asawa didto, nga icalubong na usab. Ania usab ang imong anak, nga mga kinse minutos na lang ug motaliwan na usab kini. Ug usa Siya ka Mananambal? Ang kaugalingon nimong unod ug dugo mismo; usa ra man kaha ka Pulong nga gikan Kaniya og masalbar na ang kinabuhi sa imong anak. Ingon nimo, ‘Usa Siya ka Mananambal’. Nanguha na ang mga tawo nga masultihan ka. Gisultihan ka na sa magwawali nga nalibog ka lang; nabuang ka na gyud; nahimo ka nang panatiko sa relihiyon. Ug ingon mo nga gihigugma ka Niya? Gihigugma ka ba gayud Niya?”

²⁰⁴ “Ug daw sa unsa ang imong pagtuaw alang sa imong amahan! Kung giunsa, nga sa matag gabii, nagapuasa ka, ug sa dihang ikaw . . . sa adlaw, gikinahanglan mo pang mag-ampo, bisan sa pagkatkat sa poste, sa imong pagtrabaho. Ug gitugotan

pa Niyang mamatay siya diha sa imong mga bukton, ingon nga usa ka makasasala.

205 “Daw sa unsa nga ang imong asawa, pagkabuutan kaayo nga babaye, ug imo siyang gihigugma og ayo!” Ang inahan kadto ni Billy; daghan kaninyo ang nakahinumdom kang Hope. “Pagkabuutan gayud niya nga babaye! Malipayon ka kaayo kaniadto, didto sa inyong gamay’ng panimalay; mga pito o walo ka dolyares ang kantidad sa mga gamit sa balay, mga gamit nga aduna kamo, apan bisan pa man gihigugma mo gayud siya; ug imong . . . ug gihigugma ninyo ang usa’g usa. Ug moadto pa gani ka ug moampo alang sa ubang tawo; ug tungod sa kon unsa nga mga emosyon nga sa hunahuna lang, manindog sila ug manglakaw ug moingon nga nangaayo na sila. Apan karon ang imong kaugalingong asawa; ug atua siya, nga patay na, ikaduha na ka adlaw karon, nga nagahigda didto sa punerarya, didto sa Scott and Combs. Usa Siya ka Mananambal? Huh?”

206 “Ug nag-ungaw na sa kamatayon ang imong gamay’ng anak nga lalaki, si Billy Paul, nga dise-otso ka bulan ang panuigon. Ug ang imong gamay’ng anak nga babaye usab, nga walo pa lang ka bulan ang panuigon, ania nagahigda dinhi, nga naghimalatyon, tungod sa meningitis. Ug nag-ampo ikaw; ug gipaubos sa Dios ang tabil, miingon, ‘Paghilum!’ Ayaw kang dunggon, ayaw kang paminawon, man lang! Gitalikdan ka na Niya. Usa ba gayud Siya ka buutan nga Dios? Huh? Gihigugma ka Niya? Ug ang tanang babaye nga imong nakauban, ang tanang lalaki nga imong nakauban, ang pinakasuud mong mga higala, mibiya na kanimo ingon nga usa ka relihiyosong panatiko.”

207 Ang tanan nga ginasulti niya kanako kaniadto kamatuoran. Ang tanan nga ginasulti niya, husto gayud, kita n’yo, *dinhi*. Hapit na akong moingon kaniadto, “Kung ingon-ana ako, kung ingon niana gyud diay Siya mamuhat, nan dili na ako mangalagad Kaniya.”

208 Sa diha nga isulti ko na unta kadto, May daw Sa Kung Unsa nga gikan sa kung asa man, dinha sa kinasuloran. Miingon, “Kinsa ba gyud ka diay, sa sugod pa? Ang Ginoo mihatag, ug ang Ginoo mikuha.” Kita n’yo, kana mao gayud ang tawong ania sa sulod, nga dili nagapangatarungan bisan pa man.

209 Napamalandongan ko, ug nahunahunaan ko, “Giunsa ko ba pag-anhi ibabaw sa yuta? Gikan man diay ako sa usa ka pundok sa mga palahubog. Giunsa ko ba pag-anhi dinhi? Kinsa ba diay ang naghatag og kinabuhi kanako? Kinsa ba diay ang naghatag niana nga asawa kanako? Kinsa ba diay ang naghatag niana nga bata kanako? Diin ba diay gikan ang akong asawa? Diin ba diay gikan ang akong kinabuhi?” Ingon ko, “Bisan pa nga Iya akong patyon, sa gihapon ako mosalig Kaniya.”

Ingon ko, “Pahilayo ka kanako, Satanas!”

²¹⁰ Gipandongan nako sa akong kamot ang maong bata. Miingon ko, “Sharon, honey, ipahigda ko na ikaw diha sa mga bukton sa imong inahan sa pipila ka minutos, pagmoabot na ang mga Anghel sa Dios aron kuhaon ka na, apan moabot ra ang adlaw nga magkitaay mo ni papa pag-usab. Wala ako kabalo kon unsaon nga mamahimo kini, honey. Dili ko masulti kanimo kon unsaon; sa diha nga Iya akong gitalikdan, dili na gani Siya makadungog para kanimo.”

²¹¹ Gitugotan Niya nga mamatay ang akong asawa, ug ako nga nagahawid kaniadto sa iyang mga kamot kaniadto, nagahilak kaniya. Ug ang akong papa, sa mga bukton niya, namatay sa *niining* bukton mismo; nagahangad kanako, nga ginaapas na ang iyang ginhawa. Ug nag-ampo ako sa ingon ka desperado nga mahimo ko. Unsaon ko na man pag-atubang sa mga tawo pag-usab, nga mowali og Balaanong pagpang-ayo? Unsaon ko man sa pagwali nga usa Siya ka buutan nga Dios, ug gipasagdan man nga mamatay ang mismo kong amahan, ingon nga usa ka makasala? Unsaon ko man pagwali niana? Wala ako kahibalo kung unsaon, apan nasayod ako nga husto Siya.

²¹² Dili gayud mapakyas ang Pulong sa Dios. Magmadaugon Kini, bisan unsa pa man kana. Dayon akong nahibaloan nga aduna gyu’y Sa Kung Unsang Butang diha sa kinasuloran bisan pa sa tanan niining mga pagpangatarungan, may Sa Kung Unsang Butang diha sa kinasuloran bisan pa sa tanan niining mga emosyon, bisan pa sa tanan niining uban pa nga sama niana. Adunay Tawong ania-sa-sulod nga mibarug niadtong taknaa. Wala na gayu’y uban pa nga nakabuhat niadto; ang tanang pangatarungan, maipakita ang tanan, mapamatud-an ang tanan nga sayup Kadto, ug nga anaa ako sa sayup. Apan ang Pulong sa Dios, nga gipili nang daan sa wala pa ang pagkatukod sa kalibutan, mibarug gayud sa kinasuloran.

²¹³ Nabati ko dayon ang Hangin nga misulod sa maong bilding. Mihawa na ang iyang espiritu aron sa pagtagbo sa Dios.

²¹⁴ Igsoong lalaki, igsoong babaye, sultihan ko kamo, mao lang Kana ang bugtong butang. Ayaw na pagsulay sa pagpangatarungan Niini. Ayaw paninguhaa nga magpataas og taas nga buhok tungod lang kay mao ma’y akong gisulti. Ayaw pagpaninguha sa pagbuhat niini nga mga butang aron lang, tungod, sa inyong unod. Ayaw gayud buhata kini, nga medyo aron lang og mopakigbagay. Kondili paghulat lang sa atubangan sa Ginoo, hangtud nga aduna na’y Sa Kung Unsang Butang diha sa kinasuloran!

²¹⁵ Daghan kaninyo ang naghunahuna, nga tungod kay aduna kamo og tag-as nga buhok, nagapasabot nga makaadto na kamo sa Langit. Dili kana ang buut ipasabot niana. Daghan kanila ang naghunahuna, nga tungod kay usa ikaw ka buutan, matarung nga babaye, makaadto ka na sa...?...Dili kana ang buut ipasabot niini. Daghan kanila ang naghunahuna, nga tungod kay

ang ilang mga iglesia, ug ingon nga miyembro sa *ingon-niini*, ug miyembro sa *niining* mga dagkung pundok, ug ingon nga mga Doctor sa Divinidad. Dili kana ang buut ipasabot niana. Kita n'yo?

²¹⁶ Daghan ang naghunahuna, nga tungod kay nagasulti sila sa laing mga dila, nadawat na nila ang Espiritu Santo. Dili kana ang buut ipasabot niana. Bisan pa man, nga nagasulti og laing mga dila ang Espiritu Santo. Apan hangtud nga kanang tinuod, lunsay nga Espiritu Santo nga anaa dinha sa sulod magasunod sa matag Pulong! Kung ang Balaang Espiritu nga anaa diha kaninyo, nga nagapahimo kaninyo sa pagsulti sa laing mga dila, nagatan-aw didto ug dili mouyon sa uban pa nga bahin sa Pulong, nan sayup kini nga espiritu. Kita n'yo?

²¹⁷ Kinahanglan gayud nga magagikan kini sa sulod, nga mao ang Pulong, gikan sa sinugdan pa lang. “Sa sinugdan sa pagbuhat sa Dios,” sa diha nga ang Dios nagsugod sa pagbuhat kaniadto, nagpatungha kanimo, nakita n'yo. Nagsugod ikaw kaniadto ingon nga usa ka binhi, ug nagbuhat hangtud sa kon diin ka na karon. Ug, dayon, kamong tanan anaa na diha kang Cristo. Ug dayon sa dihang namatay si Cristo, namatay Siya aron sa pagtubos kaninyong tanan. Ug kabahin kamo sa *niini* nga Pulong, ug unsaon nga . . . ang Biblia, ang tibuok Niini! “Sugo ibabaw sa sugo, lagda ibabaw sa lagda; dinhi madiyutay, didto madiyutay.” “Wala bisan ni usa ka tulpok o ni usa ka kudlit ang mapakyas.” Unsaon mo man nga mamahimo, ingon nga kabahin sa nianang Pulong, nga dili-mouyon sa tanang uban pa Niini, o sa bisan unsa nga bahin Niini?

²¹⁸ Ang Dios magapanalangin kaninyo. Nanobra na ako sa oras karon. Wala nako gituyo nga buhaton kini, nga langanon kamo sa ingon-niana kadugay. Pasaylo nga napalangan ko kamo; dili tungod sa kung unsay akong nasulti.

Ania na kita mismo sa katapusan sa usa ka butang, mga higala.

²¹⁹ Kamong tanan nga ania dinhi, siguro, mga miyembro lang dinhi sa iglesia. Wala ako nakalibot, og ayo, aron makita kung unsa nga mga miyembro ang ania dinhi. Mahunahuna ko nga kamong tanan kanunay na nga nagatambong dinhi. Sultihan ko kamo og usa ka butang nga nahitabo. Mapahanugotan pa ba ninyo, ingnon ta og, mga unom pa ka minuto? [Ang kongregasyon nagaingon, “Amen.”—Ed.]

²²⁰ Si Rev. Mr. O. Walker ba kana nga taga-Oregon, nga ania niadtong—niadtong Dominggo nga ania ako dinhi? Aduna ba'y nakahibalo? Usa ka dakung, kahibulongang butang.

²²¹ Pag-anhi ko dinhi, daghan na kaayong mga tawo nga anaa sa sulod, ako—nagkaaduna ko . . . nagkaaduna ako niadto og daghan kaayong mga pagpakighinabi, ug angay lang nga makighinabi kanako ang matag usa kanila; tungod sa ilang

batang lalaki, mga anak, ang uban mga minyo na, mga palahubog, ug—ug nagkalain-lain mga butang, ug mga butang nga angay lang gayud. Kinahanglan nga maatiman gyud unta ang matag usa kanila. Dili ko man mabuhat kana tanan. Ug ginatugyan ko kamo sa Dios, ug igapandong ang akong mga kamot sa ibabaw nila, sa pag-ampo. Ingon ko, “Oh Dios, ako—dili ko kini mahimo. Dumuol Ka kanila, Ginoo, buhata. . . Nasayod Ikaw kon unsaon kini pagbuhat. Nagaampo ako alang sa matag usa kanila.”

222 Gitawgan ako ni Billy. Bag-o lang ko nakaabot niadto uban si Igsoong Banks. Miingon siya, “Daddy, kung imong. . .”

223 Ug, tan-awa, makita ko ang mga tawo nga nagadrayb diha usahay, diha sa dalan, nga molantaw dinhi. Ug molantaw ako kanila, dayon mowarawara kanila nga sama *niana*, ug ilang—halos ilingiw na nila ang ilang ulo. Dili ko gusto nga buhaton ninyo kana.

224 Niadto miaging adlaw sa dihang paliton na unta nila kadto nga lugar didto sa Tucson aron nga akong pagapuy-an, adunay lugar didto nga gusto untag paliton ni Igsoong Tony para kanako, nga mga tulo o upat ka pilo ang kantidad kay sa niining lugar. Gusto pa gani niyang mogasto og pipila pa ka mga dolyares para niini, siya mismo. Apan ang bugtong agianan aron makasulod ka didto, adunay lalaki nga tigbantay og gate nga nagabantay didto. Usa ka dakung. . . Bueno, usa kadto ka gidugang didto. Apan pag-adunay. . . Kining mga tawo nga nagapuyo didto, kinahanglan nga aduna ka og sinulat nga permiso, dayon tawgan ka niining lalaki nga tigbantay sa gate ug hibaloon kung okey ra ba kanimo nga mosulod kini nga mga tawo.

225 Ingon ko, “Mahunahuna mo ba, ako, ang akong mga igsoong lalaki ug mga igsoong babaye nga moadto didto nga makigkita kanako, nga gustong makiglamano kanako ug nagapangayo og panalangin sa Dios alang kanako, mahunahuna mo ba diay akong ipapuyo ang kaugalingon ko dinha, Tony?”

Miingon, “Bueno, kinahanglan mong. . .”

226 Ingon ko, “Tony, ingon niana ang paagi nga gusto sa iglesia ug tanan sila aron nga dili sila maduolan sa mga tawo,” ingon ko, “alang kana sa mga tawo nga gusto nilang buhaton nako.”

227 Sila, moingon sila, “Bueno, gisultihan ako sa Ginoo. Alleluyah! Magpabilin ra kono ko dinhi mismo. Himaya sa Dios! Gisultihan ko sa Ginoo nga kinahanglan mong magpahigayon og usa ka panagtigum dinhi sa among pundok. Oo, sir, himaya sa Dios! Gisultihan ako sa Dios niana. Kung dili nimo kini buhaton, Igsoong Branham, siguradong mi-backslide na gyud ka.” Ako nga anaa dinha nga nagapaningkamot sa pagtuon, kita n’yo. Mao kana’y hinungdan, kita n’yo. Ug daghang mga buutan nga tawo ang madid-an, sa pagsulod, tungod niana.

228 Sama sa usa ka tawo nga nagapangayam dinhi sa usa ka umahan. Moingon ang usa ka mag-uuma, “Sulod ka. Mahimo kang makapangayam.” Ug miadto ka didto ug gipusil ang usa sa iyang mga baka; aduna man gyu’y rabbit nga midagan sa ilalum sa maong baka, ug gipusil lang unta ang rabbit, bisan pa. Mikatkat sa koral, imbis nga moadto sa poste ug mokatkat didto gibuhat niya unta kung unsa ang angay’ng buhaton sa usa ka desente nga tawo; pero mokatkat gyud sa koral ug gub-on kini nga sama niana. Kita n’yo? Ug dayon moingon na lang ang mag-uuma, “Paskinan ko na kining lugara!” Dili ko—dili ko siya basolon bisan gamay, bisan gamay gayud. Bueno, unsa may ginabuhat niya? Ginadid-an na niya ang buutang mangangayam nga makasulod didto. Kanunay nang ingon-niana kini. Ang dautan kini ang nagapugong sa maayo nga maoy mangibabaw. Kanunay nang ingon-niini.

229 Karon, apan kadto nga mga tawo, linibo ang mga nanginahanglan gayud ug buutan sila nga mga tawo, mahigugmaon nga mga tawo, nga puno sa grasya sa Dios.

230 Karon aduna kita og ingon-niini, kung unsa nga aduna kita’y mga tawo nga ingon niana. Dili nato, dili nato gusto kana, dili.

Apan kini nga tawo miabot nga . . .

231 Miingon si Billy, “Pag-anhi na dinhi karon, sa gilayon, daddy.” Miingon, “Ania si Mrs. Waldorf dinhi nga adunay kauban nga pipila ka naghimalatyon na nga mga tawo; kinahanglan gyud nga matan-aw na dayon sila.” Ug miadto dayon ako; mianhi dinhi.

232 Ug sa akong pagbalik, miingon sila, “Wala ma’y si binsa kinsa nga ania dinhi kondili usa ra man ka lalaki nga nagatulog diha sa daplin, dinha sa gawas, natulog diha sa unlan matag adlaw, diha sa kilid sa bilding.” Ingon pa, “Gusto niyang i-ampo mo kono siya.”

Ingon ko, “Sige.” Miingon, “Tampo ko siya.” Misulod na ko.

233 Aduna didto, siguro, usa ka Cadillac nga nakagarahe sa luyo, o usa ka matang sa dagku nga sakyanan. Misakay ko, nga . . . Ug may lalaki didto nga miingon, “Kumusta ka.” Wala siya makaila kanako.

234 Ug misulod ko. Ug misulod, si Igsoong babayeng Waldorf, ang makaluluoy’ng igsoon. Kabalo na mo, siya kaniadto . . .

235 Kabalo na mo sa iyang kahintang kaniadto, dili ba? Kita n’yo, aduna siya’y kanser; nga patay na kaniadto diha sa linya sa pagpaampo, mga usa na ka oras ayha ko siya naabtan. Miabot ang iyang doktor, gipakita . . . Mga dise-otso na kadto ka tuig ang milabay, kanser sa kasingkasing, kita n’yo, ug buhi siya karong adlaw. Ug nagapuyo siya karon didto sa Arkansas.

236 Ug atua siya sa Phoenix, kaniadto. Ug miingon siya, “Igsoong Willie, dili ko gyud gusto nga moanhi nga ingon-niini,

apan,” miingon, “Wala na ako’y lugar nga maadtoan. Sila . . . Miingon sila nga kini nga pas- . . . kini nga babaye hapit nang mamatay. Oh, Igsoong Willie!”

²³⁷ Miingon, “Gusto ko unta nga dalhan ikaw sa akong kamot og diyutay’ng halad, Igsoong Willie,” miingon, “apan dili ko kini mahimo. Apan aduna ako’y gi-andam nga pipila ka gilatik nga blackberry.”

²³⁸ Oh, sa pag-adto ko didto ug nakita kadtong gagmay’ng mga garapon sa gilatik nga blackberry nga dala niya nga nakabutang didto, ako . . . mora og sagrado kaayo kadto para kanako nga kaanon. Kita n’yo? Kadtong pinalangga nga gamay’ng tigulang na nga babaye, mga sitenta’y anyos na ang panuigon. Ingon ko, “Igsoong Hattie . . .” Ako—dili ko mahimong mobalibad. Dili. Nakita ni Jesus kadtong balo kaniadto nga nagbutang og tulo ka sentimos, ug Iyang—Iyang—gipasagdan ra Niya siya. Kita n’yo? Dili. Pagagantihan siya sa Dios tungod niana. Oo.

²³⁹ Ug busa giayo sa Ginoo kadtong maong babaye, giayo ang tanan nga aduna kaniya, gipadayag sa iyang pastor kung unsa’y iyang, siya, ang anaa sa hunahuna niya, kung unsay angay niyang pagabuhaton, uban pa. Ug, oh, nanggawas silang tanan, nga nanagsinggit.

²⁴⁰ Dayon miabot si Billy. Miingon siya, “Daddy, nawala na kadtong maong lalaki. Dili ko . . .”

Ingon ko, “Si kinsa man diay kanang anaa dinha sa sakyanan?”

²⁴¹ “Oh,” ingon siya, “usa ka lalaki nga gikan pa sa Oregon, miingon siya nga aduna kono siya og usa ka matang sa damgo. Ug giingnan ko siya, ‘Dili ko gusto nga molaum ka. Aduna pa man gud og tulo ka gatus dinhi, nga nagahulat karon.’” Ug ingon pa, “Ug gisultihan ko siya, ‘Isulat na lang ang maong damgo.’ Miingon, ‘Aduna ko’y usa ka nagtipun—og niini dinhi, nga *ingon-niana* ka taas, pa gani, ug idugang ko na lang kini dinha.’”

Miingon ko, “Pasudla siya. Hatagi siya og lima ka minuto.”

²⁴² Bueno, sa pagsulod na sa maong tawo, lima ka minuto? Miingon siya, “Ako mao si Rev. Walker,” sa hunahuna ko nga ang iyang ngalan, “taga-Oregon.” Siguro siya’y usa ka taga-laing denominasyon, wala ko kahibalo, Presbyterian, Presbyterian o ingon-niana.

²⁴³ Ingon siya, “Nahimamat ko na ikaw mga baynte na ka tuig ang milabay. Miadto ako didto sa Grants Pass kon diin ikaw . . .” Dili sa Grants Pass, apan nalimtan ko na ang ngalan sa maong lugar. “Didto,” miingon, “ang tibuok siyudad, ulohan kadto sa mga mantalaan kada buntag.” Miingon, “Nasayod ang tanan mahitungod niadto.” Ingon, “Wala gani ako makasulod sa bilding kon diin atua ikaw, apan nakita ko ikaw nga misaka. Ug usa niadto ka adlaw, diha sa dalan, miduol ko,” ingon pa, “upat

o lima gani ka lalaki ang nakapalibot kanimo, ug nakiglamano ako nimo. Ug ikaw . . . Giingnan ko ikaw nga ako si Igsoong Walker, ug imo akong giingnan kung si kinsa ka.” Ingon pa, “Nag-istoryahanay kita sa makadiyut, ug unya gipapadayon ka na sa tulo o upat ka dagkung mga lalaki nga kauban mo.” Ingon siya, “Dili ko nimo kritiko, ug dili pud ko dapig nimo.” Ingon siya, “Dili ko lang gyud masabtan.”

²⁴⁴ Ingon siya, “Nagpadayon kini nga ingon-niadto sulod sa pipila ka tuig, ug wala magdugay,” miingon, “Ako . . . gisultihan ko sa usa ka lalaki nga muadto ug maminaw sa pipila ka mga teyp, mga tulo na ka tuig ang milabay.” Ug miingon, “gipatukar sa maong lalaki ang mga teyp. Ug, sa gihimo na niya,” miingon siya, “Nadungog ko siya nga nagsulti.” Ug miingon, “Nagatoo kini nga lalaki nga ikaw usa ka—usa ka propeta. Miingon ko, giingnan ko ang maong lalaki, ‘Wala ako mahibalo nianang mga butanga; siguro, wala lang ko kabalo.’”

²⁴⁵ Busa, miingon, “Dayon usa na usab ka lalaki ang mibalhin sa among lungsod, nga nagkaaduna og usa ka panagtigum, ug nahimamat ko siya. Ug miingon siya, ‘Ako mao ang propeta sa Dios alang niini nga adlaw.’”

²⁴⁶ Ingon siya, “‘Pili na ba diay mo ka buok karon, kung ingon-ana?’ Miingon, ‘Ako—ako—nakadungog ko kon diin adunay lalaki dinhi nga nagapaminaw sa mga teyp, miingon, ‘Si William Branham, didto sa silangan, mao’y propeta niining adlaw,’ ug ingon-anang mga butang.’”

²⁴⁷ Miingon siya, “Kini nga lalaki . . .” Dili ko lang isulti ang iyang ngalan, tungod kay dili kini maayong paminawon, dinhi, nakita n’yo. “Ug miingon siya, ‘Nakaila ako kang William Branham,’ ingon pa, ‘apan sayup gayud siya sa tanan niyang Doktrina.’ Miingon, ‘Siya’y dili Pentecostal; dili siya nagatoo sa pasiunang ilhanan.’ Ug miingon, ‘Ang usa pa ka butang, ginaingon niya nga aduna kono og medyor ug minor nga mga propeta. Walay ingon-nianang butang.’ Miingon, ‘Usa ikaw ka propeta o dili usa ka propeta, ug kana lang.’”

²⁴⁸ Ingon siya, “‘Bueno, mister, ako . . . wala ako nagapakiglalis kanimo mahitungod niini. Nag-ingon lang ko nga nadungog ko kining maong lalaki nga miingon nga kining tawo nga, si William Branham . . . ug nga ginapahayag niining tawhana nga siya kono usa ka propeta.’” Miingon, “‘Naghunahuna lang ko kung pila na ka buok ang ingon niana.’”

²⁴⁹ “Miingon siya, ‘Apan gusto kong mahibaloan mo kini. Ako mao ang propeta niining kapanahonan.’”

²⁵⁰ Ingon niya, “‘Bueno, ikaw diay?’” Ingon pa, “‘Ang Ginoo magapanalangin kanimo ug magauban kanimo.’”

²⁵¹ Nagpadayon lang siya, wala gayud gyud siya naghatag og unsa man nga pagtagad niini. Ug giingon nga misugod kono siya, diha sa iyang mga kaigsoonan, sunod-sunod kon kadto nga tulo

o upat ka mga panagtigum. Ug miadto siya sa opisina sa koreyo, miingon, “Ayaw—ayaw ninyo usaba ang akong koreyo. Pasagdi lang ninyo kana dinha hangtud sa pagbalik ko, pagkahuman sa mga upat o lima ka adlaw.”

²⁵² “Sige,” ingon nila. Nagbutang sila og ilhanan didto, nga dili kadto usbon.

Miadto na siya ug nakigkita sa iyang anak nga babaye.

²⁵³ Ug dinha sa dalan, siya—mihunong siya sa usa ka simbahan. Ug nagkaaduna siya og panagtigum niadtong gabhiona. Pagkasunod buntag, ingon siya nga nahitabo kono nga nahunahunaan lang niya nga, “Adto ka ug magkuha og general delivery nga padala.” Ug sa gibuhat na niya, may usa ka sulat nga nakaabot sa opisina sa koreyo ug nakaabot sa iyang anak; gipadala sa iyang anak didto, sa general delivery nga padala.

²⁵⁴ Ug iya kadtong giablihan. Ug giingon nga usa kadto ka lalaki, si Mr. Hildebrandt, nga akong usa ka higala, nga mao ang lalaki nga nagapatukar sa mga teyp. Gikaingon nga si Mr. Hildebrandt adunay sugo gikan kang Roy Borders (ug usa siya sa mga tigdumala, kabalo na mo), nga magpahigayon ako og usa ka panagtigum dinhi, gikan sa ikabaynte-otso hangtud sa ika-uno, nga makaanhi siya ug makita niya mismo.

²⁵⁵ Miingon siya, “Karon, tan-awa ni, ginapaninguhaan gyud sa niining mga tawo nga danihon ako sa niining butang nga sama niana!” Kita n’yo? Ug iya lang gilabay kadtong sulat sa basurahan, ug nagpadayon lang, kita n’yo, nga ingon-niadto. Misulod ug gipahigayon kadtong maong panagtigum niadtong gabhiona. Ug pagkasunod buntag . . .

²⁵⁶ Dayon sugod na niyang ginapugngan ang iyang kasingkasing, sa paghilak, didto mismo sa maong lawak.

²⁵⁷ Ingon siya, “Mr. Branham, naamgo ko nga kinahanglan kong mobarug sa atubangan sa Dios.” Ingon siya, “Wala ko kahibalo kon nahikatulog ako niadto o kon unsay nahitabo.” Ingon pa niya, “Nagdango ako. Ingon ko na lang nga nakatulog ako ug nagdamgo ako.”

²⁵⁸ Miingon, “Gidamgo ko ang akong anak nga lalaki, nga atua kini sa merkado, nga gisuksok ang iyang kamot sa usa—usa ka sako.” Ug miingon, “Pagkasuksok niya, usa kadto ka sako sa mga mansanas, ug nangayabo kadto tanan.” Ingon pa, “Sa dihang ako nang puniton ang mga niini, berde kadto tanan nga mga mansanas nga may usa na ka pinaakan sa mga niini.” Miingon, “Ginapunit ko kadto, ginabalik og sulod ang mga niini sa sako.” Miingon, “Nangaligid ang uban niini, ug nangaligid paubos, busa akong giapas aron paningkamotan nga mapunit kadto, ug ilalum sa . . . didto sa kasagbotan.” Ug miingon, “Nangaligid ang mga niini ilalum didto sa usa sa mga nakakadena nga mga koral. Ug adunay daku nga super highway didto. Milingi ako sa sidlakan, ug,” ingon siya, “ang—ang—ang

maong kadena nakasangit didto sa usa ka—usa ka dakung bato didto sa sidlakan. Ug miadto ko didto, ug naghunahuna nga badbaron ko kining kadena, dayon moadto ug puniton ang mga mansanas para sa maong lalaki.” Miingon, “Ako nang gisugdan nga badbaron kadtong kadena.”

²⁵⁹ Miingon, “Dayon gitay-og sa usa ka tingog ang tibuok yuta.” Ingon pa, “Natay-og ang yuta, ilalum sa akong tiilan.” Ug miingon, “Human nga nahunong kini sa pagkatay-og, nadungog ko ang usa ka tingog.” Ug miingon, “Igsoong Branham, imoha man kadtong tingog,” ingon pa, “nasayod ko; aduna sa kung unsang butang nga gisulti kadto.” Miingon—miingon, “Ang ingon niini, ‘Pagasubayon ko kining dalana sa makausa pa!’”

²⁶⁰ Ug miingon, “Nagsugod ko nga mihangad sa bato nga atua sa itaas, nga sama *niini*, ug mitan-aw, nga lagpas sa mga panganod. Ug didto sa ibabaw, nga nagatindog sa usa ka bato nga nagasangko gikan sa sidlakan ngadto sa kasadpan, sa usa ka talinis nga porma nga sama *niana*, sama sa usa ka piramide, nga moabot hangtud dinhi sa sidlakan, ug,” miingon, “atua ka didto, nga nagsakay sa usa ka kabayo nga wala pa ako nakakita og ingon-niadto sa tibuok kong kinabuhi; dakung puti nga kabayo, nga nakabuhayhay ang puti nga buhok niini.” Ug miingon, “nakabisti ka nga sama sa usa ka hepe sa mga Indian, nga aduna kadtong tanan nga gigamit sa mga Indian.” Ingon pa, “Aduna kono kini og tabon sa dughan; mga burluloy diha sa mga bukton, ug tanan na nga nakapalibot sama niadto.” Miingon, “Gipataas mo ang imong mga kamot nga sama *niana*.” Ug miingon, “Kadtong kabayo nga nagatindog didto mora kono og kabayo pang-militar, nga nagamartsa ang linakwan nga sama *niini*, sa paglakaw,” ako kono atua ra didto sa gihapon. Ug miingon, “Gibira nimo ang mga rinda, ug nangabayon na paingon sa kasadpan.”

²⁶¹ Miingon, “Mitan-aw ako didto sa ubos, ug adunay daghan kaayong mga siyentista didto.” Ug pagkasunod buntag... Sabado kadto. Pagkasunod kadto nga buntag, miwali ako mahitungod sa mga siyentista, kabalo na mo, ingon nga mga iya sa yawa. Ug nag-ingon, “Ang mga siyentista didto nanagbubo og mga butang sa mga tubo, ug gipangsagol kadto.” Miingon, “Gipahunong mo ang maong kabayo, gipataas nimo ang imong mga kamot pag-usab ug misinggit, ‘Pagasubayon ko kining dalana sa makausa pa!’” Ug miingon, “Natay-og ang tibuok nga kayutaan. Natay-og kadtong mga tawo,” ingon pa, “nanaghangad ug nagtinan-away sa usa’g usa, nga sama *niana*, ug mihangad kanimo. Gipakibo lang nila ang ilang mga abaga, ug nanagpadayon lang sa ilang siyentipikanhong pagtuki.” Ug miingon, “Misugod na dayon ka nagpaingon ngadto sa kasadpan.

²⁶² “Ug pagkahuman niadto,” miingon, “Nakita ko kadtong lalaki nga nagpatawag sa iyang kaugalingon nga usa ka propeta,

kabalo na mo,” miingon, “mianha siya nga nakasakay sa usa ka kabayo nga may sambog nga puti ug itum.” Ug miingon, “Mipuwesto siya sa luyo niining daku kaayo nga kabayo.” Ingon, “Kadto,” miingon, “didto ibabaw sa mga panganod, ug ang maong dalan dili molapas og mga *ingon niana* kalapad.” Ug miingon, “Nagsayaw-sayaw kadtong kabayo, ngadto sa hangin nga ginahuyop ang mga balhibo niini ug tanan na ngadto sa—ngadto sa imong sinina,” ug miingon, “dayon ginahuyop ang buhok ug ikog sa maong kabayo. Ang pang-agalon og halangdon, nga daku og puti nga kabayo, diretso lang nga nagalakaw didto.” Ug miingon—ug miingon, “Nagpadagan ang maong lalaki ngadto sa luyo nimo, nga gikan pa sa Canada,” ug nagapuyo didto sa Canada kini nga lalaki. Ug miingon siya, “Balik, ug,” miingon, “gigamit niya ang gamay niyang kabayo, sa pagpaninguha nga buntugon ang imong dakung kabayo; ginapatuyok kini; gina-igo ang bat-ang niini sa . . .” Miingon, “Wala gayud kadto nakapaisbog sa dakung kabayo; nagpadayon lang kini sa paglakaw.”

²⁶³ Miingon, “Dayon, sa kalit lang,” miingon, “miliso ka.” Miingon, “Mao na kadto ang ikatulong higayon nga misulti ka, apan sa ikaduhang higayon miingon ka ‘Magasubay ako.’” Ug miingon, “Wala ka misulti sama sa imong pagkasulti kaniadto. Nagmando ka na.” Miingon, “Mituyok ka ug gitawag ang maong lalaki sa ngalan niini, ug miingon ka, ‘Pahawa dinhi! Kahibalo ka nga walay tawo ang mamahimong mosubay niini nga dalan kon wala siya gi-ordena sa Dios nga mobuhat niini. Pahawa dinhi!’”

²⁶⁴ Ug miingon, “Mituyok ang maong lalaki.” Ug ingon pa, “Nagpadala kanako og mga surat ang maong lalaki.” Ug ingon pa, “Diha sa bat-ang sa iyang kabayo,” kadtong itum ug abohon, nga gisagol, ang ingon, “diha sa bat-ang sa iyang kabayo nahisulat ang iyang ngalan, ang pirma ingon ka eksakto gayud sama sa anaa sa iyang surat. Ug nangabayo siya palayo paingon ngadto sa amihanan.”

²⁶⁵ Miingon, “Unya padayon kang nangabayo didto; mituyok kadtong dakung kabayo, paingon hangtud sa kasadpan kutob sa imong mahimo.” Miingon, “Mihangad ka ug gipataas ang imong mga kamot sama *niana*.” Dayon sugod na siyang mihilak. Miingon, “Igsoong Branham, ang makita kadtong kabayo nga nagatindog didto; uban kadtong tanan nga mga boneteng panggubat ug tanan nga sama niadto, ug,” miingon, “kadtong nagasidlak nga tabon sa dughan ug ang tanan na.” Miingon, “Dayon makadiyut mong gipataas ang imong kamot.” Ug ingon pa, “Midungo ka pag-usab, gibira ang mga rinda, nga nag-ingon, ‘Pagasubayon ko kining dalana sa makausa pa!’” Miingon, “Mitay-ug ang tibuok kalibutan, nga sama *niadto*.” Ug ingon pa, “Wala na ko’y kinabuhi nga nahibilin pa niadtong

tungora; natumba na lang ko didto sa kilid sa bato. Dayon nakamata ako.”

Miingon, “Unsa ma’y pasabot niini, sir?”

Ingon ko, “Wala ako kahibalo.”

²⁶⁶ Pagkasunod buntag... si Junior Jackson, nga nagdamgo mahitungod sa piramide, kabalo na mo, sa pag-adto ko didto sa kasadpan. Mahinumduman n’yo ba kadto? Gitawgan niya ako, usa o duha ka bulan sa wala pa kadto. Aduna siya og damgo nga nagadilaab; nga gikinahanglan niyang isulti kanako. Ug miingon ako, “Billy...”

²⁶⁷ Adunay mga baynte ka tawo ang nagatindog didto. Ingon siya, “Si Junior Jackson, didto, nag-ingon nga kinahanglan niya konong isulti kanimong kadto nga damgo.”

Ingon ko, “Pasudla siya, mga lima lang ka minutos.”

²⁶⁸ Gipasulod pud niya ang iyang asawa, ug, ingon niya, aron mamahimong usa ka testigo. Ingon siya, “Nagdamgo ako, Igsoong Branham, nagabiyahe kono ko ug ang akong asawa.” Ug miingon, “Milingi ako ngadto sa sidlakan, ug nakita ko, ang daw sa, usa ka tuldok, nga sama sa usa sa mga flying saucer.”

²⁶⁹ Kita n’yo, ang kalibutan wala nakahibalo kung unsa kana, kabalo mo. Nasayod kamo nga nagakahitabo na kini. Nasayod kita kung unsa kini. Kita n’yo? Nasayod kita nga nagasusi kini, nga mga Manulonda sa paghukom, nakita n’yo. Ug kung unsa nga ang Pentagon ug ang tanan na, mahitungod sa kung giunsa niini nga kalit lang mopaubos; ug ang intelihensiya, kung daw sa unsa nga mamahimo nila [Ginapapiti ni Igsoong Branham ang iyang mga tudlo sa makausa—Ed.] nga mopahilayo sa usa ra ka pagpangidlap ug mawala na, makapahilayo dayon gikan sa bisan unsa man nga aduna sila, kita n’yo. Kita n’yo, wala nila mahunahuna kung unsa kini, kita n’yo. Pasagdi sila nga maghunahuna kung unsay gusto nila. Ginatawag nila kini og mga flying saucer, o unsa man. Wala gyud sila makahibalo, kita n’yo.

²⁷⁰ Miingon, “Ug nakita ko kadto nga nagapadulong, ug ako kadto gitan-aw. Ug kadto mao’y, usa kadto ka lalaki nga sakay sa usa ka kabayo.” Ug miingon, “Nagapadulong siya nga dunay samang kapaspas sa kilat.” Ingon pa, “Nakita ko nga nagapadulong siya sa atubangan ko. Ug gihunong ko ang akong sakyanan, og minaug. Pagkagawas ko,” miingon, “ang sakyanan... atua na ang maong kabayo sa dalan, usa ka dakung puting pangsundalo nga kabayo nga nagamartsa ang linakwan.” Mao kana ang Pulong, siyempre, kabalo na mo, nagamartsa ang linakwan.

²⁷¹ Ingon pa, “Adunay usa ka lalaki nga nagsakay didto.” Ingon pa, “Siya—nakabisti siya og pang-kasadpan nga bisti; dili pang-cowboy, kondili,” ang ingon, “mora og usa ka hepe sa mga

magbalantay sa lasang o ingon-niana.” Kita n’yo, ang tanan niyang pang-hepe nga kagahum, nagagikan sa kasadpan; ang mga Indian nga nagapangulo sa mga Indian; nagapangulo sa mga magbalantay sa lasang, kita n’yo. Ug ingon pa, “Gipadungo sa maong lalaki ang iyang kalo, ug adunay...nagalantaw siya nga pinatakilid.” Ug miingon, “Sa dihang mitakilid siya,” miingon, “ikaw kadto, Igsoong Branham.” Ingon pa, “Nagsulti ka nga dili na gayud sama sa naandan na. Miingon ka, ‘Junior!’” Gitawag siya kono sa makatulong higayon. “Ug miingon, ‘sultihan ko ikaw kung unsay buhaton.’” Ug miingon, “Dayon imong gibira ang mga rinda sa maong kabayo. Mihimo ka og tulo ka tag-as nga mga tikang, ug mipaingon sa kawanangan, ug miadto na ka paingon sa kasadpan.”

²⁷² Ingon siya, “Pagkataud-taud, pagtan-aw ko sa palibot, ug dihay miabot nga usa ka kabayo nga mas gamay kay sa niadtong usa, nga mao ra nga kaliwat, apan mas gamay lang, ug mibarug.” Miingon, “Milakaw-lakaw ako, miingon, “Tingali’g gipadala niya kini og balik para kanako.” Miingon, “Misakay ako niini.” (Nakapangabayo na usab og diyutay si Junior. Ingon siya, “Kahibalo ka ba kung unsa ka sibo kanimo ang imong monturahan, Igsoong Branham, ang mga angkasanan ug tanan na?”) Miingon, “Naghunahuna ko, ‘Bueno, saktong ra gyud kaayo kini kanako.’ Busa gibira ko ang mga rinda, og mipaingon sa kawanangan.” Ingon pa, “Gibira ko ang mga rinda ug gipahunong kini, gipatuyok kini ug mibalik. Kita mo? Sa dihang mibalik na ko,” miingon, “Gipahunong ko ang maong kabayo, minaog ko, og nagpakig-estorya sa akong asawa. Nawala dayon ang kabayo.” Ug siya...?...

²⁷³ Dayon, sa miaging adlaw, tulo ka adlaw na ang milabay, miabot si Leo Mercier, mianha nga adunay eksaktong pareho gayud nga damgo, nga wala gani may nahibal-an mahitungod niini; mahitungod sa paninguhang ipasanay ang usa ka dakung puti nga lalaking kabayo ngadto sa usa ka itum nga babayeng kabayo, ug dili nila mahimo kini; gipangnerbiyos. Miingon nga milakaw kono ko didto, nga nag-ingon, “Leo,” ug gisultihan siya kung unsay akong gihimo. Dili ko gustong isulti kini dinhi, kita n’yo, apan gisultihan ko siya kung unsay akong gihimo. “Miingon, ‘Dili ba nimo makita? Karon, aron mahibal-an kini; wala ako kahibalo nga aduna diay umagad nga lalaki si Ed Dalton, ug ang maong umagad adunay iro sa niini nga ngalan. Mahibaloan mo, Leo, nga nagadamgo ka lang. Apan, sa dihang makamata ka na, hinumdumi kana!’” Ug miingon, “Wala pa gyud ko nakadungog og ingon-niadto nga mando.”

²⁷⁴ Niadtong mga orasa, misulod si Roy Roberson, nga miingon, “Igsoong Branham, imo bang mahinumduman kaniadto sa wala mo pa gibiyaan ang iglesia sa unang higayon? Kita mga... Nakita ko ikaw nga nagalingkod, nga mora og didto sa Palestina. Kitang tanan, ang board ug tanan na, nagalingkod nga sama

sa lamesa sa panihapon sa Ginoo, ug pagkahuman misulti ka. Ug ikaw . . . Dili siya sigurado kung unsay ginahisgotan nimo.” Miingon, “Mikunsad ang usa ka puti nga panganod ug gikuha ikaw, gidala ka pahalayo.” Pila ba ang nakahinumdom sa—sa maong damgo ni Igsoong Roy? Ug miingon, “Gidala ikaw pahalayo niadtong puti nga panganod,” ug miingon, “dayon nawala na kono ka. Naglakaw ako didto sa mga dalan, nga nagasinggit ug nagahilak.”

²⁷⁵ Sa dihang mianhi ako dinhi, ug kanang daan nang baldadong buktion, daw sa mora og iyang, ginabasa kini. Gibutang niya ang pangkahig ug misugod hilak pagkakita niya kanako nga nagapadulong didto. Wala pa mi nagkahigayon niadto nga magkitaay mao nga gisulti niya kanako ang maong damgo. Ug miingon siya . . . Ug nagapangahig siya niadtong tungora. Ingon ko . . .

²⁷⁶ “Ug—ug mibiya ka na.” Ingon pa, “Nagsige ko’g lakaw didto sa kadalanan, sa bisan asa, sa pagpangita kanimo. Wala gyud ta ka nakita, sa bisan asa. Nagasinggit ako niadto, ‘Oh, Igsoong Branham, ayaw gayud pagbiya!’” Miingon, “Miabot ang usa ka puti nga panganod ug gikuha ikaw, ug gidala na pahalayo gikan kanamo, paingon ngadto sa kasadpan.” Kadto mao’y sa wala pa ang piramide o ang unsa man. Miingon, “Gidala ikaw paingon ngadto sa kasadpan. Ug mihilak ako, ug nagsige ko’g lakaw didto sa kadalanan.”

²⁷⁷ Ingon pa, “Pagkahuman sa pipila ka gutlo miadto ako ug milingkod sa lamesa. Nahitabo nga mitan-aw ako didto sa tumoy sa lamesa.” Miingon, “Ingon *niadto* lang ang pagkakita ko kanimo, sama sa niyebe ka puti.” Miingon, “Nagatindog ikaw didto.” Ug ingon pa, “Misulti ka nga dunay kagahum. Wala gayu’y pagpangaghap.” Miingon, “Nasabtan gyud sa tanang tawo kung unsay imong gisulti.”

²⁷⁸ Oh, igsoon kong lalaki, igsoong babaye, karon, nasayod ang matag usa kaninyo, nasayod ako kung unsay buut ipasabot niadto. Kita n’yo?

²⁷⁹ Magbantay lang! Magpabilin gayud nga haduol kang Cristo. Tugoti ako nga magpasidaan kaninyo karon, ingon nga ministro sa Maayong Balita, mahitungod niini. Ayaw kamo pagdawat og bisan unsa nga kabuangan. Ayaw paghanduraw og bisan unsa. Pagpabilin kamo dinha mismo hangtud nga kining sulod sa kinasuloran nakaangkla na sa Pulong, nga anaa na kamo kang Cristo mismo, tungod kay mao lang kana ang bugtong butang nga . . . Tungod kay, ania kita sa pinakamalimbongan nga kapanahonan nga atong gikapuy-an. “Pagalimbongan niini ang mismong mga Pinili kon mahimo pa,” tungod kay aduna man sila og pagdihog, mahimo nilang buhaton ang bisan unsang butang nga sama sa uban pa kanila.

²⁸⁰ Limpyohi ninyo ang inyong mga kinabuhi. Bayari ninyo ang inyong mga utang. “Kinahanglan wala gyu’y utang kang bisan kinsa,” miingon si Jesus. Karon, karon, ang buut kong ipasabot, sama sa inyong arkila sa balay ug ingon-nianang butang, kinahanglan ninyong bayaran kini. Pangtangtanga kini nga mga butang sa inyong mga kamot. Himoang husto ang tanan. Magpangandam. Magpangandam. Hinumdumi, sa Ngalan sa Ginoo, adunay butang nga andam nang mahitabo.

²⁸¹ Moadto ako sa mga kabungturan niini nga semana, dili mismo nga mangayam og mga squirrel; siyempre, gusto ko nga mangayam og mga squirrel. Apan moadto ako didto alang niini nga katuyoan, nga nagaingon, “Oh Dios, wala ko kahibalo kung asa nga direksyon ako molihok, ug dili ko gayud gusto nga masipyat kini. Tabangi ako.”

²⁸² Iampo ninyo ako. Mahimo ba ninyong buhaton kini? Igaampo ko usab kamo. Nagalaum ako, nga sa kalooy sa Dios, nga makita ko ang matag usa kaninyo, ug magtagbo kita didto sa usa ka mas maayo nga Yuta kay sa niini dinhi.

²⁸³ Ug unsa ba’y gianhi nato dinhi? Unsa ba’y ginahimo nato? Mianhi ba kita dinhi, aron magdula? Mianhi ba kita dinhi, nga nagakatigum ingon nga usa ka kapunongan? Kini mao’y, dili mahimong moabot si Cristo hangtud nga ang Iglesia mamahimong hingpit na gayud ka husto. Nagahulat Siya kanato. Nagatoo ko nga ania na kita sa katapusan.

²⁸⁴ Tan-awa ninyo, sa California. Tan-awa ninyo ang mga kagubot. Tan-awa ninyo ang dise-nuebe ka mga tawo nga gipatay, tungod lang sa ilang kaliwat. Dili ba gisulti ko na kaninyo, dinhi dili pa lang dugay, nga pangunahan sa nianang Martin Luther King ang iyang mga kaliwat ngadto sa pagka-masaker? Pila ba ang nakahinumdom niana? [Ang kongregasyon nagaingon, “Amen.”—Ed.] Dili kini tungod kanilang itum nga mga tawo; tungod kini sa niining mga tigpamuno nga nagasugyot kanila. Dili kini tungod sa integrasyon, sa segregasyon, ug unsa pa man nga gusto nilang itawag niini; tungod kini sa yawa. Husto kana. Dili lamang sa mga puti, mga itum; sa ilang tanan. Tungod kini sa yawa.

²⁸⁵ Nadaut na ang mga galamhang pangisip ug mga pangatarungan sa tawo. Wala na’y paglaum pa. Wala na gyud kini og paglaum pa. Ang tibuok butang usa na ka samad nga nagakaut-ut na. Ang mga galamhang pangisip sa tawo; dili na gyud nila mahimo ang hustong pagdesisyon.

²⁸⁶ Dili ako usa ka pulitiko. Dili ako, ni Democrat o Republican. Pareho silang mahugaw. Ako’y para sa usa ka Gingharian, ug kana mao ang Gingharian ni Jesus Cristo. Kana lang. Apan unsa ma’y nahitabo nga nakakita mo og usa ka pundok sa mga nagapaitoy-itoy nga sama sa aduna kita karon dinha sa mga nakahataas, sama nianang pundok sa mga taga-Texas nga aduna

kita dinha? “Aba,” moingon sila, “bisan unsa man ang gusto sa mga tawo! Kung gusto nila og komunismo, hatagan nato sila og komunismo. Kung gusto nila og pagkausa, hatagan nato sila og pagkausa. Kung gusto og pagpahilain, ihatag nato bisan unsa.” Gibuhat kining. . . Hain na ba ang lalaki?

²⁸⁷ Oh Dios! Sama kana sa pulpito. Hain na ba ang lalaki, kanang lalaki nga lalaki gayud, nga nagabarug alang sa usa ka prinsipyo? Hain na ba ang mga kababayan-an nga nagabarug alang sa usa ka prinsipyo? Hain na ba ang iglesia nga nagabarug alang sa usa ka prinsipyo? Wala ko’y bisan singko man lang nga kantidad sa panahon alang sa usa ka paling-paling, mahuyang, makig-kompromiso nga espiritu. Ang babaye ingon nga babaye, kinahanglan magpaka-babaye. Kung ang lalaki usa gayud ka lalaki, magpaka-lalaki siya.

²⁸⁸ Kung siya’y usa ka presidente. . . Asa na karon ang atong mga John Quincy Adams? Asa na karon ang atong mga Abraham Lincoln, mga kalalaken-an nga aduna gayu’y prinsipyo? Asa na ang atong Patrick Henry, nga nag-ingon, “Hatagi ako og kagawasan kay kon dili hatagi ako og kamatayon”?

²⁸⁹ Asa na ba ang lalaking nagabarug alang sa kung unsa’y matarung? Asa na ba ang lalaking dili mahadlok sa pagsulti? Bisan pa, ang tibuok kalibutan batok kaniya, isulti niya kung unsa’y matarung; ug barugan kini ug bisan mamatay pa tungod niini. Asa na ba karon ang atong Arnold von Winkelried usab? Asa na ang mga tarung nga lalaki? Asa na ba ang mga lalaking may espiritu? Sila’y mga paling-paling na ug mga mahuyang na kaayo hangtud nga dili na sila kahibalo kung asa sila mobarug.

²⁹⁰ Dios, itugot nga magabarug ako nga aduna ang mga prinsipyo sa usa ka Tawo, ingon nga usa ka ministro, ang Pulong ni Jesus Cristo. “Kay ang mga langit ug yuta mangahanaw, apan Kini dili gayud mapakyas. Ibabaw niing Bato Akong pagatukoron ang Akong Iglesia; ang mga ganghaan sa hades dili makabuntog batok Niini.”

Magapanindog kita.

Blest be the tie that binds
Our hearts in Christian love;
The fellowship of kindred mind
Is like to that Above.

Karon guniti ang mga kamot sa usa’g usa.

When we asunder part,
It gives us inward pain;
But we shall still be joined in heart,
And hope to meet again.

Till we meet! till we meet!
Till we meet at Jesus’ feet;
Till we meet! till we meet!
God be with you till we meet again!

²⁹¹ Iduko nato ang atong mga ulo karon, samtang ipapauli na kita ni Igsoong Neville, diha sa usa ka pag-ampo.

²⁹² Balik kamo unyang gabii, ha. Nagalaum kita alang sa usa ka dakung panerbisyo unyang gabii, dinhi sa tabernakulo. Panalanginan kamo sa Dios. Ug iampo ninyo ako; iampo ko kamo.

²⁹³ Ayaw ninyo hunahunaa nga usa ako ka panatiko, mga higala. Ayaw ninyo hunahunaa nga ginapaningkamotan kong ipamugos ang usa ka butang diha kaninyo. Gihigugma ko kamo. Ug aduna ako'y prinsipyo, kana mao ang Biblia. Wala ni usa ka Pulong ang mahimong pagatangtanganon gikan Niini. Wala ni usa ka Pulong ang mahimong igadugang Niini. Ug ginatoohan ko Kini sa paagi nga gisulat Kini.

²⁹⁴ Iduko nato ang atong mga ulo karon, ug ipapauli na sa atong maunongon, buutan nga pastor ang kongregasyon. Panalanginan ka sa Dios, Igsoong Neville.



UG WALA MAHIBALO NIINI CEB65-0815
(And Knoweth It Not)

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Agosto 15, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org